

摘藻堂四庫全書薈要

史部

欽定四庫全書會要

史部

御批通鑑綱目卷一上

詳校官編修臣汪鏞

欽定四庫全書薈要卷七千三百三

史部

御批資治通鑑綱目卷一上

起戊寅周威烈王二十三年  
盡乙巳周赧王五十九年  
凡一百四十八年

周威烈王二十三年  
秦簡公十二年晉烈公止十

當五年燕閔公三十一年○魏文侯斯二十二年趙烈

侯籍六年韓景侯虔六年皆始為侯○統舊國五新國

三凡八考異按歲年例曰橫行之上甲字子字別之以

大國朱橫行之下正統朱書國號謚號君名列

國朱注國名圈下朱注總結凡若干國今考朱書朱注

刊本當用白字然坊本行上甲子仍用白字則行下朱

注皆當易以白字後並倣此又威烈王名細注據凡例

於正統君名下注曰如云午則此午字亦當比晉帝奕

例大考證

謹按春秋左傳終於魯悼公四年是為周貞定王五年也自是曠六十一年始為通鑑何

耶春秋以降諸侯相吞滅者有之而大夫滅其君自三晉始天子不恤同姓而爵其賊臣此通鑑所以託始也左傳終智伯通鑑始智伯通鑑不敢續春秋所以接左傳也綱目分註智伯之始終三晉之事實皆六十一年事也嗚呼書詩降而春秋春秋降而綱目蓋將揭綱常於既淪敘彝倫於已斃故曰大綱槩舉而鑑戒昭矣其亦萬世君臣所當追念者歟

初命晉大夫魏斯趙籍韓虔為諸侯考

異提要韓虔在魏斯趙籍上後凡大書分注並韓虔在魏斯上

司馬公曰天子之職莫大於禮禮莫大於分分莫大於名何謂禮紀綱是也何謂分君臣是也何謂名公侯卿大夫是也夫以四海之廣兆民之衆受制於一人雖有絕倫之力高世之智莫不奔走而服役者豈



非以禮為之綱紀哉故天子統三公三公率諸侯諸侯制卿大夫卿大夫治士庶人貴以臨賤賤以承貴而君臣之分猶天地之不可易然後上下相保而國家治安然禮非名不著非器不形名以命之器以別之然後上下粲然有倫名器既亡則禮安得獨在哉故繁縷小物也而孔子惜之正名細務也而孔子先之蓋事未有不始於微而成於著聖人之慮遠故能謹其微而治之衆人之識近故必待其著而後救之治其微則用力寡而功多救其著則竭力而不能及也嗚呼周道之衰綱紀散壞禮之大體十喪七八然猶歷數百年宗主天下徒以名分尚存故也今晉大夫暴蔑其君剖分其地天子既不能討又寵秩之使得列於諸侯是區區之名分復不能守而并棄之也先王之禮於斯盡矣或者以為當是之時周室微弱三晉彊盛雖欲勿許其可得乎是大不然夫三晉苟不顧天下之誅則不請命而自立矣不請命而自立

則為悖逆之臣天下苟有桓文之君必奉禮義而征之今請於天子而天子許之是受天子之命而為諸侯也誰得而討之故三晉之列於諸侯非三晉之壞禮乃天子自壞之也嗚呼君臣之禮既壞則天下以智力相雄長遂使聖賢之後無不泯絕生民之類靡滅幾盡豈不哀哉胡氏曰陰陽之運天地之化物理人事之始終皆自芒忽毫釐至不可禦故修德者矜細行圖治者憂未然君子所以貴於見幾而作也夫三晉之欲剖分宗國舊矣自悼公以來陰凝冰堅垂及百載王之命之蓋亦不得已焉是故善為天下國家者每謹於微而已矣卑宮惡服慮侈汰也不遑暇食防逸豫也慄慄危懼戒驕溢也動守憲度虞禍亂也不為嗜欲則娛樂之言無自進不好功利則興作之計無自生誠如是雖使六卿並起三家輩出莽操懿溫接跡於朝方且效忠宣力之不暇而何有於他志是故韓趙魏之為諸侯孔子所謂吾末如之何者

人君監此亦謹於微而已矣。○初智宣子將以瑤為後，智果曰：「不如宵也。」瑤之賢於人者五，其不逮者一也。美鬚長大，則賢射御，足力則賢技藝，畢給則賢巧文，辯慧則賢彊毅，果敢則賢如是而甚不仁。夫以其五賢陵人，而以不仁行之，其誰能待之？若果立瑤也，智宗必滅，弗聽。智果別族於太史，為輔氏。趙簡子之子長曰伯魯，幼曰無恤，將置後，不知所立，乃書訓戒之辭於二簡，以授二子曰：「謹識之。」三年而問之，伯魯不能舉其辭，求其簡已失之矣。問無恤，誦其辭甚習，求其簡出諸袖中而奏之。於是簡子以無恤為賢，立以為後。簡子使尹鐸為晉陽，請曰：「以為繭絲乎？抑為保障乎？」簡子曰：「保障哉！」尹鐸損其戶數。簡子謂無恤曰：「晉國有難而無以尹鐸為少，無以晉陽為遠，必以為歸。」及智宣子卒，智襄子為政，與韓康子、魏桓子宴於藍臺。智伯戲康子而侮段規，智國聞之諫曰：「主不備難，必至矣。」智伯曰：「難將由我，我不為難，誰敢興之？」

對曰不然夏書有之曰一人三失怨豈在明不見是圖夫君子能勤小物故無大患今主一宴而恥人之君相又不備曰不敢興難無乃不可乎蝼蟻蜂蠆皆能害人况君相乎弗聽智伯請地於韓康子康子欲弗與段規曰智伯好利而愎不與將伐我不如與之彼狃於得地必請於他人他人不與必嚮之以兵然則我得免於患而待事之變矣康子曰善乃與之智伯悅又求地於魏桓子桓子欲弗與任章問焉桓子曰無故任章曰無故索地諸大夫必懼吾與之地智伯必驕彼驕而輕敵此懼而相親以相親之兵待輕敵之人智氏之命必不長矣不如與之以驕智伯然後可以擇交而圖之奈何獨以吾為智氏質乎桓子曰善亦與之智伯又求蔡皋狼之地於趙襄子襄子弗與智伯怒帥韓魏之甲以攻之襄子將出曰吾何走乎從者曰長子近且城厚完襄子曰民罷力以完之又斃死以守之其誰與我從者曰邯鄲之倉庫實

襄子曰浚民之膏澤以實之又因而殺之其誰與我  
其晉陽乎先主之所屬也尹鐸之所寬也民必和矣  
乃走晉陽三家圍而灌之城不浸者三版沈竈產龜  
民無叛意智伯行水魏桓子御韓康子驂乘智伯曰  
吾乃今知水可以亡人國也桓子肘康子康子履桓  
子之跗以汾水可以灌安邑絳水可以灌平陽也絺  
疵謂智伯曰韓魏必反矣智伯曰子何以知之對曰  
以人事知之夫從韓魏而攻趙趙亡難必及韓魏矣  
今約勝趙而三分其地城降有日而二子無喜志有  
憂色是非反而何明日智伯以其言告二子二子曰  
此讒臣欲為趙氏游說使主疑二家而懈於攻趙也  
不然二家豈不利朝夕分趙氏之田而欲為此危難  
不可成之事乎二子出絺疵入曰主何以臣之言告  
二子也智伯曰子何以知之對曰臣見其視臣端而  
趨疾知臣得其情故也智伯不悛趙襄子使張孟談  
潛出見二子曰臣聞唇亡則齒寒趙亡則韓魏為之

次矣二子乃陰與約為之期日而遣之襄子夜使人殺守隄之吏而決水灌智伯軍智伯軍亂韓魏翼而擊之襄子將卒犯其前大敗其衆遂殺智伯滅其族而分其地惟輔果在司馬公曰智伯之亡也才勝德也聰察彊毅之謂才正直中和之謂德才者德之資德者才之帥也是故才德全盡謂之聖人才德兼亡謂之愚人德勝才謂之君子才勝德謂之小人凡取人之術苟不得聖人君子而與之與其得小人不若得愚人然德者人之所嚴才者人之所愛愛者易親嚴者易疏是以察者多蔽於才而遺於德自古以來國之亂臣家之敗子才有餘而德不足以至於顛覆者多矣豈特智伯哉○趙襄子漆智伯之頭以為飲器智伯之臣豫讓欲為之報仇乃詐為刑人挾匕首入襄子宮中塗廁左右欲殺之襄子曰智伯死無後而此人欲為報仇真義士也吾謹避之耳讓又漆身為癩吞炭為啞行乞於市其妻不識也其友識之為

之泣曰以子之才臣事趙孟必得近幸子乃為所欲  
為顧不易邪何乃自苦如此讓曰委質為臣而求殺  
之是二心也吾所以為此者將以愧天下後世之為  
人臣而懷二心者也後又伏於橋下欲殺襄子襄子  
殺之胡氏曰君子為名譽而為善則其善必不誠人  
臣為利祿而效忠則其忠必不盡使智伯有後而豫  
子為之報仇其心未可知也智伯無後矣而讓也不  
忘國士之遇以死許之至再三而愈篤則無所為而  
為之者真可謂義士矣然襄子知其如此而終殺之  
何以為人臣之勸哉○襄子為伯魯之不立也有子  
五人不肯置後立伯魯之孫浣是為獻子獻子生籍  
是為烈侯魏斯者桓子之孫是為文侯韓虔者康子  
之孫是為景侯蓋自三家之滅智伯至是五十一年  
矣○魏文侯以卜子夏田子方為師每過段干木之  
廬必式四方賢士多歸之文侯與羣臣飲酒樂而天  
雨命駕將適野左右曰今日飲酒樂天又雨君將安

之文侯曰吾與虞人期獵雖樂豈可無一會期哉乃  
往身自罷之韓借師於魏以伐趙文侯曰趙兄弟也  
不敢聞命趙借師以伐韓對亦如之二國皆怒已而  
知文侯以講於己也皆朝于魏魏由是始大於三晉  
文侯使樂羊伐中山克之以封其子擊他日問於羣  
臣我何如主皆曰仁君任座曰君得中山不以封君  
之弟而以封君之子何謂仁君文侯怒座趨出次問  
翟璜對曰仁君也文侯曰何以知之對曰君仁則臣  
直嚮者任座之言直是以知之文侯悅使璜召座而  
反之親下堂迎之以為上客文侯與田子方飲文侯  
曰鐘聲不比乎左高田子方笑文侯曰何笑子方曰  
臣聞之君明樂官不明樂音今君審於音臣恐其聾  
於官也文侯曰善子擊出遭田子方於道下車伏謁  
子方不為禮擊怒謂子方曰富貴者驕人乎貧賤者  
驕人乎子方曰亦貧賤者驕人耳富貴者安敢驕人  
國君而驕人則失其國大夫而驕人則失其家失其



國家者未聞有以國家待之者也夫士貧賤言不用行不合則納履而去安往而不得貧賤哉擊乃謝之文侯謂李克曰先生有言家貧思良妻國亂思良相今所置非成則璜二子何如對曰卑不謀尊疎不謀戚臣在闕門之外不敢當命文侯曰先生臨事勿讓克曰居視其所親富視其所與達視其所舉窮視其所不為貧視其所不取五者足以定之矣文侯曰先生就舍吾之相定矣李克出翟璜曰聞君召先生而卜相果誰為之克曰魏成璜忿然曰西河守吳起臣所進也君內以鄴為憂臣進西門豹君欲伐中山臣進樂羊中山已拔無使守之臣進先生君之子無傳臣進屈侯鮒以耳目之所睹記臣何負於魏成克曰子之言克於君者豈將比周以求大官哉君問相於克克之對如是所以知君之必相魏成者成食祿千鍾什九在外是以東得卜子夏田子方段干木此三人君皆師之子所進五人者君皆臣之子惡得與成

比也璜再拜謝曰鄙人失對願卒為弟子吳起者衛人仕於魯齊人伐魯魯人欲以為將起取齊女魯人疑之起殺妻以求將大破齊師或譖之曰起始事曾參母死不奔喪曾參絕之又殺妻以求為將起殘忍薄行人也起恐得罪聞魏文侯賢乃往歸之文侯問諸李克克曰起貪而好色然用兵司馬穰苴弗能過也於是文侯以為將擊秦拔五城起為將臥不設席行不騎乘親裹贏糧與士卒最下者同衣食分勞苦卒有病疽者起為吮之卒母聞而哭之或問之對曰往年吳公吮其父其父戰不還踵遂死於敵吳公今又吮其子妾不知其死所矣○趙烈侯好音謂相國公仲連曰寡人有愛可以貴之乎連曰富之可貴之則否君曰然鄭歌者槍石二人吾賜之田人萬畝連諾而不與烈侯屢問連乃稱疾不朝番吾君謂連曰君實好善而未知所持公仲亦有進士乎連曰未也曰牛畜荀欣徐越皆可連進之畜侍以仁義烈侯道

然明日欣侍以舉賢使能明日越侍以節財儉用察  
度功德所與無不充君說乃謂連曰歌者之田且止  
以畜為師欣為中尉越集覽繁纓小物也而孔子惜  
為內史賜連衣二襲之左傳成二年衛孫桓

子與齊師戰衛將敗新築大夫仲叔于奚救桓子是  
以免既衛賞之以邑辭請繁纓以朝許之仲尼聞之  
曰惜也惟器與名不可以假人注繁纓馬飾皆諸侯  
之服也器謂車服名謂爵號繁步干反字與樊通禮  
巾車樊纓注樊讀如鞞帶之鞞今馬大帶也纓當胃  
以削革為之六卿春秋晉有智氏趙氏韓氏魏氏范  
氏中行氏號六卿後晉君失政六卿專權貞定王十  
一年智趙韓魏共滅范中行而分其地十六年趙韓  
魏又共滅智氏而分其地安王二十六年三家共廢  
晉君而分其地三家即趙韓魏也號為三晉晉陽地  
理志太原有晉陽縣括地志云并州太原地名大明  
城古晉陽也正義曰即古并州繭絲指賦稅而言保

障指藩籬而言尹鐸之意不在賦稅而在藩籬此其所以保晉陽也損其戶數減損戶數則賦稅輕民力舒也為少少始紹反段規韓康子之相主不備謂主若不預備則難至矣記坊記大夫不稱君恐民之惑也注大夫有臣者稱之曰主不言君辟諸侯也左傳史墨對趙簡子曰主所知也質乎質音贅猶言貨也蔡臯狼臯狼趙邑名本春秋蔡地故曰蔡臯狼地理志西河郡有臯狼縣長子周史辛甲所封後為趙邑屬上黨今潞州縣禮職方氏其川漳注漳出長子長丁丈反左傳襄十八年晉人執衛行人石買于長子注長丁丈反唯史書長子顏師古音長短之長恐誤邯鄲趙地音寒丹今磁州縣在州北五十里洺州肥鄉縣亦邯鄲地也有邯鄲山在東城下不浸者三版浸當作沒廣二尺曰版驂乘乘石證反顏師古曰乘車之法尊者居左御者居中又一人處其右以備傾側是以戎事稱戎右其他則曰驂乘驂三也蓋取三

人為名義耳汾水分源出嵐州靜樂北管涔山東南入并州即西南經絳州蒲州東北歷安邑西南入河安邑魏桓子邑漢河東郡也括地志云故城在絳州夏縣東北十五里東坡禹迹圖云禹都平陽或云在安邑今安邑又名禹都城蓋禹避舜子于此非都也絳水地理志絳水在信都南索隱曰水出信都與雩池漳河合流入海正義曰絳源出潞州屯留縣西南方山東北流冀州入海平陽韓康子邑昔堯之都也於詩為唐國今平陽府是締疵晉人締當作郟案姓譜諸書未有從糸者疑是借字郟音隙使主疑二家韓魏二家佯尊智伯故稱曰主飲器索隱曰大宛傳匈奴破月氏以其王頭為飲器韋昭云飲器枿榼也晉灼云虎子屬也案枿榼用以盛酒耳非用飲者晉以為洩便器者以韓子呂氏春秋並云襄子漆智伯頭為洩杯故也正義曰劉氏云酒器也每賓會設之示恨深耳案此說恐非羅璧識遺曰案史韻飲音蔭

顏師古引匈奴傳以月氏王頭共飲血盟為證謂飲酒器貴之也且死骨凶穢又惡人頭顱豈俎豆所宜乎洩便釋蓋似之萬見春亦是晉釋七首劉向說苑曰尺八短劍也其頭類七故名七首禮冬官桃氏為劍注七首長二尺重二斤一兩三分兩之一漆身漆有毒人近之則患瘡腫若癩然故讓漆身以變其容吞炭國策曰豫讓乞食其妻曰貌不似吾夫何其音似吾夫讓遂吞炭以變其音委質服虔曰委棄其形質而君事之示必死節於其主也左傳僖二十三年策名委質注名書於所臣之策屈膝而君事之必式記曲禮篇尸必式注小俛以禮之韻會注乘而俛首致恭曰式義取憑軾也軾車前橫板有所敬則俯而憑之孔曰古者車箱長四尺四寸而三分之前一後二橫一木下去車牀三尺三寸謂之軾軾上二尺二寸橫一木謂之較立乘平常則憑較若應為敬則落手隱下軾而頭得俯俛中山狄都也漢為國有盧奴

北平北新城唐深澤苦陘安國曲逆望都新市索隱  
曰今中山府是翟璜案姓苑翟本音狄後人姓乃音  
澤左高為句鮑彪注言左方之聲高案左方之聲謂  
阼階東笙鐘之聲也君明樂官國策作君明則樂官  
不明則樂音鮑彪注樂音洛謂以治官為樂審於音  
審者言聽之察也西河春秋晉地今太原府汾州是  
屈侯鮒屈姓也名鮒起貪索隱曰李克言吳起貪下  
文云魏文侯知起廉平又公叔之僕稱起節廉豈前  
貪而後廉耶起家本千金破產求仕今言貪非實貪  
也貪榮名耳母死不歸殺妻求將是也司馬穰苴穰  
苴田完之裔先為齊大司馬故稱司馬穰苴所著書  
名司馬法槍石二歌者之名槍七羊反番吾君失其  
姓名正義曰常山郡番吾縣疑即古番吾君邑番音  
婆又音盤又音蒲字亦作蒲括地志云故城在恒州  
房山縣東二十里侍以侍猶言勸也適然正義曰適  
古攸字攸攸氣悅也寬緩貌充君說說讀曰悅二襲

上下皆具曰襲國語謂之稱賈逵案禮記喪大記曰袍必有表不禪衣必有裳謂之一稱正誤家輩出今按三家指魯大夫孟孫叔孫季孫之家趙韓魏已在六卿中不應復舉此義至為易見集覽開卷之初輒謬誤若此愚故不避僭踰而述是編也質乎今按胡三省註質物相綴當也一讀如字謂榘質也質的也智伯怒必加兵於魏如榘質之受斧質的之受矢也亦通締疵今按締作郝抽遲切古字多借用之飲器今按漢書匈奴傳云單于以老上單于所破月氏王頭為飲器者共飲血盟然則酒器是也若漉便器則不可盛血飲矣君明樂官今按樂如字言人君當明樂官擇人而任之不必明樂音也充君說今按充字當屬上文所與無不充五字為質實志晉陽句充滿也言凡所賜與皆稱其功德也古邑名周唐叔虞始封之地春秋時屬晉戰國時屬趙秦滅趙置晉陽縣為太原郡治所漢因之晉沒於



劉石後魏屬太原郡隋唐仍舊宋初改為平晉軍尋復為晉陽縣屬并州元屬太原路國朝改為太原縣屬太原府長子古邑名周史辛甲所封之地春秋時屬晉戰國時屬趙後屬秦漢置長子縣屬上黨郡後魏分置樂陽縣北齊二縣俱廢隋初置冀氏縣尋改為長子縣唐宋金元仍舊國朝因之屬潞州邯鄲古邑名春秋時屬晉戰國時為趙所都秦滅趙置邯鄲郡漢廢郡為縣屬趙國曹魏屬廣平國隋初屬磁州後省入洺州唐初復置屬洺州後改屬磁州宋金元仍舊國朝因之改屬廣平府汾水源出太原府岢嵐州流經靈石趙城洪洞臨汾等縣南歷襄陵太平絳州稷山河津滎河等縣注于黃河安邑禹所營之邑春秋時為晉境戰國時屬魏後屬秦漢置安邑縣為河東郡治所晉魏因之隋初置虞州後改為安邑郡唐初罷郡復置虞州至德初改為虞邑縣屬陝州大厯中復名安邑屬河中府宋屬解州金元仍舊國朝

因之仍屬平陽府絳水源發平陽府絳縣西流入聞喜縣與涑水合經夏縣安邑臨晉猗氏等縣界至蒲州東南入于黃河平陽本堯之都邑以其地在平水之陽故名春秋時屬晉戰國時屬韓後屬趙秦漢皆為河東郡地三國魏置平陽郡晉仍舊隋改為臨汾郡唐初改為晉州後改為平陽郡宋改郡為府金屬河東路元初為平陽路後改晉寧路國朝改為平陽府屬山西道中山古狄都也春秋時屬晉戰國時屬魏後屬秦漢初為中山郡後改中山國曹魏改定州晉慕容垂都此隋改博陵郡唐初改定州後復為博陵郡尋更為義武軍節度宋陞為中山府金元因之國朝改為定州屬真定府西河古地名春秋時屬晉戰國時屬趙秦漢皆為太原郡地三國魏置西河郡治茲氏縣晉為西河國後魏置汾州後周改為介州隋復為西河郡唐初改浩州尋改汾州屬河東道金置汾陽軍節度元復為汾州國朝因之隸山西道司

馬穰苴田完之後齊景公時晉伐阿甄而燕侵河上  
公患之晏嬰薦穰苴文能附衆武能威敵公拜為將  
軍使捍燕晉之師乃申明約束監軍莊賈後期斬以  
徇軍燕晉聞之皆解去厥後齊威王用兵大倣穰苴  
之法而諸侯來朝王乃追論古者司馬兵法而附穰  
苴於其中因號曰司馬穰苴兵法番吾漢之縣名屬  
常山郡本春秋晉之蒲邑也魏晉以來廢之隋置房  
山縣屬恒山郡唐初屬恒州後改為平山縣宋金元  
皆仍舊本朝因之屬真定府

### 書法

初命何病周也三家分晉各三四世矣三家  
滅智氏分其田趙自襄子始襄子卒桓子立

桓子卒獻子立獻子卒籍立○魏自桓子始桓子  
孫斯○韓自康子始康子卒武子立武子卒虔立  
命之為諸侯則於是始也以周為固亂故病之或  
曰通鑑之托始於是也朱子於感興篇嘗有迷先

幾之疑矣綱目修通鑑者則曷為無改焉蓋夫子之修春秋也曰其義則某竊取之又曰述而不作知此則知朱子之綱目矣是故仍溫公之文於其首備胡氏之論於其後其意槩可見也

發明

昔在先王分爵五等建萬國而親諸侯褒有功而表有德凡有民有土者非上世神明之

胄則勤勞宣力之臣爾曷嘗僭及篡竊之人哉自姬轍既東王室衰微禮樂不由于天子征伐出自於諸侯泯泯棼棼聖人憂之筆削一經垂法萬世凡列國君臣之事無微不錄皆所以示褒貶之實于時諸侯不王而王朝之恩下及列國者不一而足春秋皆深為惜之是以錫命於魯在桓公則王不稱天以見濫賞之失在成公則天王稱子以見卑屈之意至於小白葵丘之會重耳踐土之盟雖嘗使宰孔賜胙及尹氏策命然皆不見於經夫在內則書以示譏在外則削而不錄聖人筆削之旨

其嚴若此今焉晉之三家弁髦其君瓜分其國正  
天誅所宜加王法所不賁者周不能討則亦已矣  
從而命之果何意耶考之遷史於周記固曰命韓  
魏趙為諸侯而於魏世家特曰魏趙韓列為諸侯  
耳於韓世家特曰與趙魏俱得為列侯耳於趙世  
家特曰魏趙韓皆相立為諸侯耳初未嘗有請命  
於周之語夫請而見許先儒猶謂天子之自壞禮  
况實未嘗請而天子自命之乎綱目於此文無損  
益然大書而首揭之者所以繼魯史之絕筆猶托  
始隱公之意云爾大抵周於諸侯初不顧理之逆  
順而惟顧勢之彊弱曩時曲沃并晉詩人徒知請  
命于周之美而不計其傾覆宗國之罪今三家分  
晉自立爵以邦君使他日復有篡奪之臣周亦必  
移其命三晉者命之矣周固持此為取悅之具而  
不知陪臣可以并諸侯則諸侯亦可并天子此固  
勢之所必至者去之千百載唐人以偏裨殺逐主

帥聽其代立其不顧上下之分如出一轍故周亡於諸侯唐亡於藩鎮其禍亦若合符節綱目書此所以正綱常之本示人道之端為萬代之深戒者也有天下國家者可不監諸又按三晉之事通鑑取為篇首且深以禮與名分為言故我昔神祖製序謂王制自此而盡此亦古人造端立本之意蓋深察司馬氏之用心至胡寅著讀史管見復以謹微立論今分注取之備載于下其說亦幾無餘蘊矣臣發明綱目推考三家自立未嘗請命之實且深原朱文公熹大書托始之意此皆取綱領節目之大者以為之說庶幾先後更相發明而著書之意益以暴白云爾然嘗即是思之自漢以前王澤未泯一宇宙也自漢以後王澤盡斬又一宇宙也所以然者秦併天下盪滅古制故其流至此極耳夫秦在諸侯為後封之國介在西戎當春秋時雖嘗與中國會盟然始焉與晉媾聯既更韓原之戰

亦未遽絕迨重耳反國秦繆奔走好會無役不與  
翊成晉霸未幾晉文即世肉未及寒遽有于穀之  
役自此晉秦交惡迭相攻擊蓋自彭衙至于河曲  
畧無寧歲秦亦未始得志於晉觀之厲公麻隧之  
戰呂相絕秦之言則可見矣至春秋末年悼公復  
霸大合諸侯之衆敗秦于殽林由是秦不復振終  
春秋世擯斥不通秦之所以莫能肆虎狼之暴者  
皆晉之力能制其命也夫晉為姬姓之屬藩屏王  
室據形勢之要表裏山河屏蔽東諸侯之國秦界  
處其西俗混戎翟雖有狡焉思啓封疆之意制於  
晉而不得逞固不能捨近而攻遠是以范雎謂韓  
魏中國之處而天下之樞於此見晉之地勢足以  
控秦而秦之所患莫晉若也自三家分晉重以魏  
釐繆戾遂失河西秦始得以蠶食山東卒併天下  
世儒立論往往咎六國不能堅守合從之約遂為  
秦有然臣則謂秦之所以能併諸侯者原於三家

之分晉也向使晉國不分則以全力制秦秦豈能越晉而併天下哉由是言之六國之滅不係於合從不合從而係乎晉之分不分晉不分為三雖不合從秦不可得而有晉既分為三雖合從秦不可得而拒蓋晉未分則形勢強既分則形勢弱況晉國既分之後韓魏趙各以一國之力尚能抗秦若三國為一必無秦患不待智者而後知秦不能併吞諸侯則先王遺制猶有存者萬一他國得志亦恐未必如秦之暴故夫王澤之斬自秦併天下始秦併天下自三家分晉始此固天地之大機也嗚呼三家之分國其有關於天下之大勢國統之離合者如此然則世之君子當知是書首此不徒以著周室之衰亦所以著秦人併吞六國之因不徒以著禮制之失亦所以著古今世道更變之端

己卯  
二十四年

燕僖公元年

王崩子驕立



是為  
安王

# 盜殺楚君當

書法

楚入綱目貶稱君僭王也至周亡始稱王稱  
薨書盜殺始此終綱目書盜殺十一是年楚

君當安王五年俠累七國癸亥黃歇漢後主延熙

十六年費禕晉懷帝永嘉六年賈疋梁戊午魏李

延孫己巳東魏高澄唐玄宗開元十五年王君奭

肅宗寶應元年李輔國憲宗元和十年武元衡僖

宗中和四年王鐸不書官者三黃歇王君奭李輔

國書使盜殺三漢光武十一年公孫述殺來歙岑

彭獻帝建安二年

袁術殺陳王寵

庚辰安王元年

楚悼王

秦伐魏

發明

凡兵聲罪致討曰伐當王室盛時征伐為天子大權諸侯無交伐之理至春秋則此制已

紊况戰國乎然秦在春秋屢與晉交兵臣前蓋已論之矣自魯襄十四年書叔孫豹會十三國伐秦之後終春秋世秦晉無復兵爭又自春秋後著之遷史亦無大侵伐至是垂二百年始有伐魏之舉于時魏方分晉不為無罪然秦實未嘗致討特為盜邊之計而已綱目凡此類例以伐書之者地醜德齊莫能相尚故用兵交伐迭書于冊所以著黷兵之罪耳惟夫入綱目之初秦首書伐則其首亂王制首開兵禍他時并吞天下其兆已見於此固君子尤當加察者臣故表而出之

辛巳二年魏韓趙伐楚考異

提要有趙侯籍卒四字今刊本漏

○鄭圍韓

陽翟集覽

陽翟地志潁川陽翟縣翟音宅索隱音狄括地志云洛州縣今屬鈞州

撫實

一統

志云陽翟古地名春秋時為鄭之櫟邑戰國時為韓國秦為陽翟縣兼置潁川郡漢因之晉屬河南郡東魏置陽翟郡隋廢郡以縣屬襄城郡唐屬嵩州後屬許州宋屬潁昌府金改為鈞州以州有鈞臺故名元仍舊本朝因以陽翟縣省入屬開封府

壬午三年

秦惠公趙武侯韓烈侯取元年

號山崩壅河集覽

號山地志弘農陝縣故號

國也山在陝州陝縣西二里臨黃河今河濱有岡阜似是潁山之餘

書法

記異也書山崩始此終綱目書山崩二十六是年漢呂后乙卯文帝元年宣帝本始四年

元帝建昭四年成帝建始三年河平三年元延三年和帝永元元年十二年殤帝延平元年安帝永初六年延光二年三年四年順帝永和三年桓帝建和三年和平元年永興二年永壽元年延熹三年

年獻帝初

平四年晉元帝太興四年再崩安帝義

熙五年隋煬帝大業七年而壅水者四是年漢元

帝建昭四年河平三年元延三年岸

崩壅水不與焉漢元帝建昭四年

癸未四年楚圍鄭

甲申五年日食

書法

不書某月缺也蓋戰國之記注多略矣書日食始此終綱目書日食三百六十七不書月

者六至漢高帝

三年始書月

發明

春秋日食三十六或日或不日然未有以年書者綱目是年與二十年及烈王元年七年

赧十四年之類日食皆不書其月考之前史亦然然後知當時史官不職失其紀錄為可知矣不然

綱目豈於天戒而故略  
之書之所以著其失也

# ○盜殺韓相俠累

俠累與濮陽嚴仲子有惡仲子聞軹人聶政之勇以  
黃金百鎰為政母壽欲因以報仇政不受曰老母在  
政身未敢以許人也及母卒仲子乃使政刺俠累俠  
累方坐府上兵衛甚衆聶政直入刺之因自皮面決  
眼自屠出腸韓人暴其尸於市購問莫能識其姊嫫  
聞而往哭之曰是軹深井里聶政也以妾在之故重  
自刑以絕從妾奈何畏沒身之誅

## 集覽

俠累戰國策  
作韓傀高誘

終滅賢弟之名遂死政尸之旁

曰即俠累也名傀俠古挾反累力追反嚴仲子嚴遂  
字仲子有惡如字史記作有卻軹人軹縣深井里人  
也地志河內有軹縣故城在孟州濟源縣東南戰國  
魏邑今濟源南三十里有軹城村皮面決眼索隱曰

皮面謂以刀刺其面皮欲令人不識決眼謂出其眼  
睛戰國策決作抉注挑也姊嫫嫫音驚史記作榮索  
隱曰榮其姊名重自刑以絕從徐廣曰恐其姊從坐  
而死也索隱曰重持用反復也謂以妾故復自刑其  
身令人不識也從音蹤古字少假借故無足旁徐氏  
以為從坐非也劉貢父亦音足松反正義曰重直龍  
反刑亦作刊說文刊剗也重愛惜也本為嚴仲子報  
仇訖愛惜其事不令漏泄以絕蹤跡其姊妄云為己  
在故隱 **撫實** 一統志云濮陽古邑名春秋時屬晉戰  
誤矣 國時屬韓後屬秦漢廢之以其地屬濟  
陰郡晉置濮陽郡隋置濮州唐初因之後復為濮陽  
郡五代唐復為濮州宋仍舊金屬大名府元直隸省  
部本朝因之屬東昌府軹古邑名東周為畿內地春  
秋時屬晉戰國時屬魏後屬秦漢置軹縣屬河內郡  
後廢之今名軹村故城在懷  
慶府濟源縣南一十三里

發明春秋昭二十年書盜殺衛侯之兄繫左氏以  
為齊豹先儒以為宗魯若齊豹則有位于朝  
若宗魯則身為驂乘聖人且以盜書之况聶政刺  
客小人真穿窬之微者爾書之為盜夫復何說嘗  
怪馬遷作史特取聶政著之列傳累百千言而不  
厭若有深嘉樂予之意向微君子直筆書之則千  
載之下必有聞風效之  
者矣觀者不可不知

乙酉  
六年鄭弒其君駘

書法

弒君者駘子陽之黨也不書稱國君無道也  
初子陽相鄭繻公殺之故及書弒君始此綱

目書廢而弒者廿稱國者一齊寶卷書弒者七十

三稱國者七鄭駘代鬱律涼張祚西燕主冲西燕

主忠燕主雲宋子業

夷蠻書弒不與焉

丙戌七年

書法

無事必書備編  
年也後倣此

發明

春秋二百四十二年未有一年無事者則以當時史官猶謹其紀錄之職故聖人得以因

而修之爾況於戰國日尋干戈安得無事而每每  
間見若此則以衰亂之世史官失職故也然綱目  
雖無事亦備歲年者此正編年之法爾若夫春秋  
四時具然後成歲故雖無事必書首時至綱目則  
止書歲者自末周至五代蓋一千三百六十二年  
歲月既久文字繁夥固不得純用春秋之法此又  
隨時變通之義君子所當加察者也

丁亥八年齊伐魯



戊子九年魏伐鄭

己丑十年

晉孝公傾元年

庚寅十一年秦伐韓宜陽取六邑集覽

宜陽索隱曰弘農宜陽縣在澠池西

南今河南府宜陽是括地志云故韓城一名宜陽城在洛州福昌縣東

撫實

一統志云宜陽古邑名周

為召伯聽訟之所春秋時屬晉戰國時屬韓後屬秦漢置宜陽縣屬新安郡後魏置宜陽郡後周改為熊州以縣屬焉隋屬河南郡唐改縣曰福昌後唐改福慶縣宋復為宜陽縣金元仍舊本朝因之屬河南府

○齊

田和遷其君貸於海上食一城

和田恒之曾孫也

書法

田和何以不書大夫知為大夫者不若是甚矣然則三晉亦不臣矣則曷為以晉大夫書

書晉大夫所以病王也

辛卯十二年秦晉戰于武城集覽

武城括地志云故武城一名武平城在華州鄭

縣東

○齊伐魏○魯敗齊師于平陸集覽

平陸正義曰兖州縣也平

北

陸城即古厥國

質實

一統志云平陸春秋魯邑名即古厥國也戰國屬楚後屬秦漢置平

在大梁東界

陸縣屬東郡東漢省入須昌縣北齊置樂平縣隋復改為平陸縣屬魯郡唐初屬兖州後改為中都縣金改為

汶上縣屬東平府本

朝因之屬兖州府

壬辰十三年秦侵晉○齊田和會魏侯楚人衛人于濁澤

求為諸侯集覽

濁澤地志濁水出齊郡廣縣屬媯山徐廣曰長社有濁澤案趙世家中山伐魏

敗涿澤正義曰涿音濁徐云長社之濁澤非也括地志云濁水源出蒲州解縣東北平地爾時魏都安邑韓趙伐魏豈河南至長社也當是解縣濁水近於魏都

田和求為諸侯魏文侯為之請於王及諸侯王許之

書法

會未有無故者綱目不言故會而言故必醜辭也故濁澤之會書求為諸侯于郊之會書

田

詳顯

王十四年

徐州之會書

相王

顯

王三十六年皆醜之也

發明

自陳恒弑其君孔子沐浴而朝請魯致討而魯君方制於三家有不能也當是時也陳恒

之罪有天地之所不容人神之所共憤人皆得而誅之則上無天子下無方伯暴亂肆行莫知禁也

循至田和遂併齊而有之今也前書遷其君於海上繼書求為諸侯則其篡奪之實固不可誣周既不能制三晉於前其能制田氏於後哉後三年遂命為侯矣然田氏猶能請命于周者何耶彼見周人既命三晉而不及己也以為己與三晉等爾一予一否尤而效之周亦何辭於田氏而遲之久者亦不得已之意焉爾比而觀之則當時君不君臣不臣其罪皆曉然具見於書法之間矣吁

癸巳十四年

甲午十五年秦伐蜀取南鄭集覽

南鄭漢中郡邑今興元所理縣三國魏孫資曰

南鄭直為天獄中即此

撫實一統志云南鄭周褒國附庸之邑名鄭桓公歿於犬戎其民南奔居此因

曰南鄭秦厲公城其地漢為南鄭縣東漢置漢中郡治此西魏改光義縣隋復為南鄭唐宋元仍舊本朝因之

屬漢中府

○魏侯斯卒

書法

諸國入綱目稱爵及僭王則貶稱君卒皆稱卒至周亡則稱王卒稱薨綱目不皆卒諸侯

有事而后卒惟王崩立悉書之王立名諸國卒稱名失國名卒不名者不得其名也夷蠻之君書死

發明

按禮諸侯曰薨大夫曰卒五等邦君何以書卒夫子作春秋凡外諸侯皆書卒先儒謂周

室東遷諸侯放恣專享其國上不請命聖人黜之

特書曰卒蓋不與其為諸侯爾綱目取法春秋故

凡諸侯所以書卒者此也然則何以名之諸侯不

生名則死而名之禮也以小白重耳之盛莫不書

名綱目亦春秋之法耳雖然綱目於赧王既亡之

後諸侯又皆書薨何哉蓋赧王未亡之前天子在

上故以王法而正諸侯之卒逮赧既亡則上無天

子故諸侯聽其稱薨此又隨時變通之意綱目之

所不得已者  
嗚呼微矣

○魏吳起奔楚楚以為相

魏武侯浮西河而下顧謂吳起曰美哉山河之固此  
魏國之寶也對曰在德不在險昔三苗氏左洞庭右  
彭蠡德義不修禹滅之夏桀之居左河濟右泰華伊  
闕在其南羊腸在其北修政不仁湯放之商紂之國  
左孟門右太行常山在其北大河經其南脩政不德  
武王殺之由此觀之在德不在險君若不脩德舟中  
之人皆敵國也武侯曰善魏相田文起不悅謂文曰  
請與子論功可乎文曰可起曰將三軍使士卒樂死  
敵國不敢謀子孰與起文曰不如子起曰治百官親  
萬民實府庫子孰與起文曰不如子起曰守西河而  
秦兵不敢東鄉韓趙賓從子孰與起文曰不如子起  
曰此三者子皆出吾下而位加吾上何也文曰主少

國疑大臣未附百姓不信方是之時屬之子乎屬之  
我乎起默然良久曰屬之子矣久之魏相公叔害起  
諧之武侯疑之起懼誅遂奔楚楚悼王素聞其賢至  
則任之為相起明法審令捐不急之官廢公族疏遠  
者以養戰士要在彊兵破游說之言從橫者於是南  
平百越北却三晉西伐秦諸侯皆患楚之彊而楚之  
貴戚大臣

集覽

西河括地志云河在冀州西故名西  
河三苗氏書蔡氏傳曰三苗國在江

南荆揚之間恃險為亂者也今湖南溪洞時猶竊發  
俘而詢之多為貓姓豈其遺種歟正義曰今江鄂岳  
三州之地是地理沿革表今潭州古三苗國洞庭湖  
在岳州巴陵西吞赤沙南連青草橫亘七八百里  
風土記云鼎澧沅湘合諸蠻黔南之水匯于洞庭至  
巴陵與荆江合正義曰以天子在北故洞庭在西為  
左彭蠡在東為右彭蠡湖在潯陽東南五十三里禹  
貢彭蠡既豬蔡氏傳曰地志在豫章彭澤縣東合江

西江東諸水跨豫章饒州南康之地所謂鄱陽湖者是也夏桀之居帝王世紀禹封夏伯今河南陽翟縣是汲冢古文太康居斟鄩羿亦居之桀又居焉括地志云鄩城在洛州鞏縣西南河濟禹貢濟河惟兗州蔡氏傳曰兗州之域東南據濟西北距河河濟之間相去不遠地志河水自勝州東直南至華陰即東至懷州南又東北至平州碣石入海濟水出常山房子縣贊皇山東至鉅鹿癭陶縣入泚索隱曰濟水出河東垣縣王屋山東其流至濟陰故應劭云濟水出平原陰縣東泰華泰通作太禹貢至于太華蔡氏傳曰地志太華山在弘農華陰縣今華州華陰南二十里也禮職方氏曰豫州山鎮曰華山伊闕括地志云關塞山一名伊闕而俗名龍門高誘曰伊闕在洛陽西南六十里禹所辟也酈道元注水經云禹疏龍門以通水兩山相對望之若闕然伊水歷其間故名伊闕羊腸山在太原西北九十里正義曰羊腸阪道在太



行山上南口屬懷州北口屬潞州括地志云羊腸阪在懷州河內縣北二十五里商紂之國鄭玄曰商國在泰華之陽皇甫謐曰今上洛商也括地志云商州東八十里商洛縣古商國也孟門賈逵曰孟門太行皆晉山隘也索隱曰孟門山在朝歌東北劉氏案紂都朝歌孟門在其西今言紂之國左孟門則東邊別有孟門也或謂今石州孟門縣是太行山在河內山陽縣西北上黨南正義曰在懷州河內北二十五里從橫從將容反橫與衡通胡盲反孟康曰南北為從東西為橫瓚曰以利合為從以威勢相脅為橫正義曰諸說皆未允關東地從長六國共居之蘇秦相六國令從親而擯秦故曰合從關西地橫廣秦獨居之張儀相秦破關東從道使連秦之橫故曰連橫百越謂非一種也猶言百蠻韋昭曰越有百邑故曰百越

**撫實** 一統志云洞庭湖名在岳州府城西南禹貢九江孔殷註云即洞庭也沅漸元辰敘酉澧資湘

九水皆合於此故名九江又九江沅資湘最大皆自南而入荆江自北而過洞庭豬其間名為五豬戰國策云秦與荆戰大破之取洞庭五豬是也每歲六七月間岷峩雪消水暴漲自荆江逆入洞庭清流為之改色彭蠡湖名在南康府東南一名官亭一名揚瀾左里一名鄱陽闊四十里長三百里巨浸瀰漫中有雁泊小湖西接南昌東抵饒州北流入于江禹貢東匯澤為彭蠡是也河濟二水名河水源自平陽府垣曲縣東流懷慶府濟源孟溫三縣境入河南府鞏縣界濟水源發懷慶府濟源縣王屋山下曰沆水既見而伏復出於此為濟有二源東源周迴七百步其深莫測西源周迴七百八十五步其深一丈與東源合流至溫縣南入于黃河其水性下且勁過黃河之南溢而為滎往東若斷若續或伏或見而入于海泰華二山名泰山在濟南府泰安州北五里即東嶽岱宗也舜東巡狩至此其山屈曲盤道至絕頂高四十餘

里有石表東嶽廟封禪壇在焉華山在西安府華陰縣南一十里即西嶽也以西有少華山故此曰太華白虎通云西方有太陰用事萬物生華故曰華山伊闕山名即闕塞山也在河南府城西南三十里左傳晉趙鞅納王使女寬守闕塞即此一名伊闕亦名闕口大禹疏龍門伊水出其間漢服虔謂南山伊闕是也俗名龍門山羊腸坂名在潞州壺關縣東南一百六里漢地理志壺關有羊腸坂長三里盤曲如羊腸孟門山名在平陽府吉州西七十里呂不韋曰龍門未闕呂梁未鑿河出孟門之上即此山也太行山名在懷慶府城北二十里山勢繚亘數千里雖各因地立名其實皆名太行禹貢太行恒山至于碣石蓋相接也常山常與恒同山在真定府曲陽縣西北一百四十一里天文志恒山辰星主焉爾雅曰恒山為北

嶽蓋祀典  
五嶽之一

乙未十六年

秦出公魏武侯擊趙敬侯章韓文侯元年○田齊太公和元年○統秦晉齊楚燕趙魏韓

舊國八田齊新

考異

提要分註統字下作并

初命齊田

和為諸侯考異

據卷首魏斯趙籍韓虔稱晉大夫此田和上漏大夫字

書法

田和何以不書齊大夫

據魏斯趙籍韓虔稱

命之者無貶乎貶必於其事端貶命晉大夫久矣然則

者意自見矣非以其請命歟不書請命書求為諸

侯則固不以田

和為可命也

○魏襲趙邯鄲不克

丙申十七年秦庶長改弑其君及其君母

庶長改迎靈公之子于河西而立之是  
**集覽**  
庶長改

為獻公遂殺出子及其母沈之淵旁  
庶長注

見報王二年改名也史失其姓河西正義曰西者  
秦州西縣秦之舊地時獻公在西縣故迎立之

**書法**

國母書弒始此終綱目母后  
書弒九詳漢靈帝中平六年

**發明**

按史秦靈公卒子獻公不得立立靈公季父  
悼子是為簡公簡公十六年卒子惠公立惠

公十二年子出子生十三年惠公卒出子立出子  
二年庶長改迎靈公之子獻公于河西而立之殺  
出子及其母沈之淵旁夫獻公靈公之子不得嗣  
位則固當時用事大臣之罪爾昔齊公子商人驟  
施於國弒其君舍而自立未幾商人為邴歇閻職  
所賊春秋不書曰盜反以弒君之罪歸諸齊人誠  
以商人所以得為君者齊人君之也今出子繼簡  
公惠公之後而簡公惠公出於秦人之所共立固

無商人弑君自立之罪至於出子已歷三世秦人既已舉國君之則出子固秦人之君而秦乃出子之國矣戕而弑之果何義哉前史書殺出子及其母視之甚輕而馬遷年表又以誅出公書之竊意出子在當時母子甚微故史氏亦待之以不足錄耳至綱目始書弑其君及其君母特著其變之甚大而秦人覆載不容之罪亦始有不可得而掩者然後知綱目書法之意蓋亦考其實而正其名不以勢之強弱而廢君臣之分所以扶三綱立人極為後世之戒耳昔孟子有言孔子成春秋而亂臣賊子懼臣謂綱目之脩其治亂臣賊子尤為嚴謹凡前史未正之獄未名之惡皆大書而特書之于以繼麟經之絕筆示萬世之大關使亂賊之徒其罪終不可得而泯沒庶幾人類有立不為無父無君之歸臣固亦曰綱目修而亂臣賊子懼者此也學者其母以常事視之常詞讀之則得其旨矣

韓伐鄭遂伐宋

丁酉十八年

秦獻公齊桓公午元年

戊戌十九年魏敗趙師于兔臺集覽

兔臺地名在河北

己亥二十年日食晝晦集覽

日食注見漢惠帝七年

書法

日食至於晝晦非小變也凡日食食既為甚星晝見次之晝晦又次之皆大異也終綱目

書曰食三百六十七而晝晝晦者三  
四年漢呂氏庚申書星晝見者二  
是年赧王十宋文帝己巳唐

肅宗上元二年書食既者

十有二詳漢惠帝七年

庚子二十一年楚君類卒楚人殺吳起

悼王薨貴戚大臣作亂攻吳起殺之因射刺起并中王尸太子臧即位討為亂者夷七十餘家

書法

稱人何衆辭也然書殺則愈於衛鞅矣鞅書誅

發明

前書魏侯斯卒魏吳起奔楚此書楚君類卒楚人殺吳起則是用起者魏楚之君而怨起

者魏楚之人也夫大臣佐君澤加於民則愛之若父母安有在魏而魏不容在楚而楚見殺哉起以功利富强之術中其君而虐用其民一旦禍發則足以殺其軀而已然起既得罪于楚綱目不書誅而書殺何也因射刺起并中王尸則當時羣臣作亂之罪亦不容泯故不得而誅之惟夫書以楚人則足以見人皆欲殺之之意云爾後之欲圖富強者可不鑒諸

辛丑 二十二年

楚肅王

臧元年

齊伐燕○魏韓趙伐齊



壬寅二十三年 是歲齊亡統秦晉楚燕 趙襲衛不克○齊

侯貸卒無子田氏遂并齊

書法

書遂何罪辭也然上書卒無子則愈於三晉矣

癸卯二十四年 齊威王因 狄敗魏師于澮集覽 于澮澮古外反括地

志云澮高山一名澮山在絳州翼城東北二十五里澮水出焉杜預曰澮水出平陽絳縣南西入汾索隱曰言于澮者於澮水之側也 撫實 一統志云澮水源出平陽府翼城縣東七十五里烏嶺山下西流至絳州

入于汾水 ○魏韓趙伐齊

甲辰二十五年 晉靖公俱 蜀伐楚

乙巳二十六年

韓哀侯元年○是歲晉亡統秦楚燕魏趙韓齊凡七大國

王崩子喜立

是為烈王

三晉共廢其君俱酒為家人而分其地集覽

俱酒乃靖公之名也

索隱曰系本作靖公俱家人韋昭曰庶人之家也索隱曰謂居家之人無官職也

書法

韓趙魏與晉並列為諸侯於是各歷數世矣晉烈公止孝公傾靖公俱酒凡三世魏文侯

斯武侯擊凡二世趙烈侯籍武侯敬侯章凡三世

韓景侯虔烈侯取文侯哀侯凡四世書曰廢其君

何以不臣之罪罪之也故不稱魏趙韓而稱三晉

據前伐齊再書魏韓趙繫之以晉所以明其不臣

也歷三四世而君臣之分不可泯綱目之法嚴矣

故自是恒稱三晉終綱目書廢君三十四俱酒漢

少帝昌邑孺子弘農王魏山陽公齊王芳吳主亮  
晉陳留王海西公宋零陵王營陽王齊汝陰王海  
陵王浚陵王梁巴陵王魏主曄主恭主朗北齊中  
山王梁主綱主棟魏主欽周宋公陳江陰王北齊  
濟南王陳臨海王隋介公唐鄴公中宗唐鄂王吳  
越弘侖漢湘陰公楚希萼書幽三石鑒魏孝靜唐  
昭宗書遷二晉惠魏子攸廢書奉二梁濟陰  
吳讓皇廢不成其君三蕭正德淵明唐重茂

丙午烈王元年日食○韓滅鄭自陽翟徙都之

書法

書滅  
始此

丁未二年

趙成侯  
種元年

戊申三年燕敗齊師于林狐集覽

林狐燕世家作林營索  
隱曰地名一云林地名

於林地立營  
故曰林營

○魯魏伐齊

己酉四年

燕桓公元年

趙伐衛取都鄙七十三集覽

都鄙按禮十邑曰都

五百家

○魏敗趙師于北藺集覽

北藺地理志藺屬西河郡正義曰今屬石

為鄙

州在趙之西北

故或云趙北藺

庚戌五年魏伐楚○韓嚴遂弑其君

哀侯以韓廙為相而愛嚴遂二人  
相害遂刺廙於朝而并中哀侯

書法

於是嚴遂刺韓廙於朝并中哀侯何以不書  
及其相韓廙大臣非死國不書廙遂二人相

害則兩下相殺而已  
耳兩下相殺不書

# 魏侯擊卒

武侯不立太子至是子瑩與公中緩爭立國內亂

集覽

瑩乙耕反公中緩正義曰中音仲

辛六年

魏惠王瑩韓懿侯元年

齊侯來朝

時周室微弱諸侯莫朝而齊獨朝之天下以此賢威王

書法

書來朝何嘉尊周也八綱目三十四年非卒未有稱爵者稱齊侯嘉之也書來朝始此周

世書來朝者二詳顯王二十六年惟此以美書

發明

禮王制諸侯五年一朝書周官六年五服一朝則諸侯朝於天子者禮也一朝則黜其

爵再不朝則削其地三不朝則六師移之則諸侯不朝于天子其罪亦不可逭矣自周之衰諸侯不

王以春秋二百四十二年觀之魯以宗國之重公及大夫朝王者僅八見于經然皆因事而見實非能朝天子朝京師也宗國且爾况他國乎春秋且爾况戰國乎今齊以強大之國乃能特舉朝禮入見于周則是空谷足音晦冥日月絕無而僅有者也天下賢之宜矣然齊自一朝之後繼是無聞焉使其五年一朝能如王制六年一朝能如周官則亦諸侯事天子之常禮何足多哉惟夫天下不朝而齊獨朝之所以見稱於當時爾綱目書此蓋亦樂予人為善之意於以見齊侯之賢於以見周室之削於以見天下之無王雖曰幸之其亦傷之觀者要當推而廣之可也

趙伐齊○魏敗趙師于懷集覽

懷古河內也案韓詩外傳武王伐紂禱于邢丘

更名邢丘曰懷括地志云故懷城在今懷州武陟縣西十里

質實

一統志云懷春秋晉之邑名戰國屬

趙後屬秦漢為懷縣屬河內郡隋析置武陟縣屬殷州  
唐初於此置陟州後州廢以縣屬懷州省懷縣入馬宋

金元仍舊本朝  
因之屬懷慶府  
○齊侯封即墨大夫烹阿大夫

齊威王召即墨大夫語之曰自子之居即墨也毀言  
日至然吾使人視即墨田野辟人民給官無事東方  
以寧是子不事吾左右以求助也封之萬家召阿大  
夫語之曰自子守阿譽言日至吾使人視阿田野不  
辟人民貧餒趙攻鄆子不救衛取薛陵子不知是子  
厚幣事吾左右以求譽也是日烹阿大夫及左右嘗  
譽者於是羣臣聳懼莫敢飾詐  
**集覽** 即墨本萊州邑  
務盡其情齊國大治彊於天下  
地志云故即墨城在今登州膠水縣南六十里阿杜  
預曰濟北東阿是本齊之柯邑齊桓公與魯會柯而  
盟即此今為祝阿括地志云故城在今東平府東阿  
縣西南鄆音絹秦為東郡縣漢為濟陰鄆城縣今屬

濮州質實

一統志云即墨春秋齊之邑名以其地臨墨水故名即墨漢置縣為膠東國治東漢屬北

海國晉屬濟北國北齊省隋復置之唐宋仍舊元屬膠州本朝改隸萊州府阿春秋齊之邑名戰國末屬秦漢置東阿縣屬東郡晉屬濟北國隋屬北齊郡唐初屬濟陽郡後屬鄆州宋屬東平府金元仍舊本朝因之隸兗州府鄆春秋齊之邑名戰國末屬秦漢置鄆城縣屬濟陰郡晉於此置濮陽郡隋改為濮州唐初為濮陽郡後復為濮州治鄆城縣宋仍舊金屬大名府元直隸省部本朝因之隸東昌府

書法

特書齊侯嘉不惑也凡美惡在其君則斥書主

壬子七年

楚宣王良夫元年

日食○王崩弟扁立

是為顯王



# 韓趙伐魏圍安邑

韓公孫頤謂懿侯曰魏亂可取也懿侯乃與趙成侯合兵伐魏大破其兵遂圍安邑成侯曰殺瑩立公中緩割地而退我二國之利也懿侯曰殺魏君暴也割地貪也不如兩分之魏分為兩不彊於宋衛則我終無魏患矣趙人不聽乃解而去太史公曰魏惠王之所以身不死國不分者二國之謀不和也若從一家之謀魏必分矣故曰君集覽頤索隱曰音祁終無適子其國可破也

癸丑顯王元年齊伐魏○趙侵齊

甲寅二年

乙卯三年秦敗魏韓之師于洛陽集覽

洛陽書多士篇序曰成周既成注成

周洛陽下都案是古洛陽城也今質實一統志云洛陽河南府洛陽縣東北故城在焉成周之地名居洛水之北故曰洛陽春秋時屬晉戰國時屬魏秦屬三川郡漢為河南郡治東漢改為雒陽魏復為洛陽晉因之隋遷郡治河南縣唐改洛陽為永昌尋復舊宋初河南洛陽二縣並置金以河南縣省入洛陽縣元仍舊本朝因之屬河南府

丙辰四年魏伐宋

丁巳五年秦敗三晉之師于石門賜以黼黻之服集覽石

趙世家作石阿正義曰在石隰二州界黼黻之服白與黑相次畫為斧形曰黼青與黑相背畫為亞形曰黻案亞古弗字也禮司服疏云黻近刃白近上撫實一統志黑取其善斷也黻取臣民背惡向善之義云石門

在平陽府解州東南自徑嶺踰中條山通陝州  
道山嶺參天左右壁立間不容軌謂之石門

斬首  
六萬

書法

賜服不書此何以書前年秦兵至洛陽無忌  
憚孰甚焉於是而又敗三晉之師于石門黼

黻之賜周之所以自免者末矣書悲之也終綱  
目書賜服二是年唐天寶八載楊釗皆譏辭也

發明

諸侯終喪入見則有錫禮所謂喪畢以士服  
見已見賜之黻冕是也歲時來朝則有錫詩

所謂君子來朝又何子之玄衮及黼是也秦西方  
之戎翟自春秋末年不與中國之會盟久矣入綱  
目以來首書伐魏至是前年書敗魏韓今年書敗  
三晉尚功首虜害虐烝民罪固不容於誅周天子  
不能治之則亦已矣反乃賜以黼黻之服是教以  
殺人之事而賞殺人之賊也果何義耶且夫三晉

之民中國之民也斬首至於六萬復何罪乎自是而後秦日益張至於併吞之勢已成乃始欲約從伐之尚奚及哉直書于此則周人妄賞之失固自不言可知兵禍何時而弭歟吁

戊午  
六年

己未  
七年  
魏敗韓趙之師于澮○秦敗魏師于少梁集覽

少梁正義曰即馮翊夏陽縣也魏有大梁故以少梁別之今同州韓城縣南二十里古少梁國撫實一

志云少梁春秋晉之邑名即古韓梁二國地也秦更名夏陽縣漢屬馮翊郡隋析置韓城縣以古韓城為名唐屬同州五代梁唐屬河中府宋因之金改禎州元復為韓城縣本朝因之屬西安府故城在韓城縣南二十二

里

○秦伯卒

秦獻公薨子孝公立生二十有一年矣是時河山以東疆國六淮泗之間小國十餘楚魏與秦接界魏築長城自鄭濱洛以北有上郡楚自漢中南有巴黔中皆以夷翟遇秦擯斥之不得與中國之會盟於是孝公發憤修政

集覽

巴古巴子國有巴西巴東巴郡注見漢獻帝建安十九年黔中春秋

欲以彊秦

巴地戰國屬楚秦取之置黔中郡漢改武陵郡後周

改黔州故城在今辰州西二十里槃瓠之後也黔音

琴撫實

一統志云巴秦之郡名即周巴子國也秦滅蜀置巴郡漢因之治江州縣漢末劉璋改為

永寧郡晉復為巴郡宋齊復為巴郡梁改為楚州

西魏改為巴州隋初改為渝州後復為巴郡唐初復

為渝州後改為南平郡五代時為王建孟知祥所據

宋初改為恭州後陞重慶府元置重慶路本朝改為

重慶府屬四川道黔中秦之郡名即古蠻蜚所居之

地春秋戰國時屬楚秦置黔中郡漢改為武陵郡東

漢因之三國時初屬蜀後屬吳梁改為沅州隋初改  
曰朗州後復為武陵郡唐初復為朗州後改為武貞  
軍五代梁曰武順軍唐曰武平軍宋初屬朗州後陞  
為常德軍節度元改常德路本朝改為常德府屬湖  
廣道

發明

秦伯何以不名史失其傳名不登於簡冊也  
春秋諸侯凡與會盟聘問者卒則名之如宋

公和陳侯鮑之類是也其不與會盟聘問者卒則  
不名如滕侯卒宿男卒之類是也綱目不書名者  
如此年之秦伯三十八年韓侯之類考之前史皆  
不載其名雖或間見於後人附注之中亦不得知  
其實故皆從滕侯宿男之例亦及史闕文之意也  
若強以附注不可信之名而名之則失春秋之旨  
矣

庚申八年

秦孝公燕文公元年

彗星見西方集覽

彗星杜預曰彗所以除舊布新也音

似義反正義曰彗徐醉反又先到反妖星光芒偏指如  
彗者也春秋鉤命決宋均注云彗五彗也色蒼則王侯  
破天子苦兵赤則賊起彊國恣黃則女害色權奪后妃  
白則將軍逆二年兵大作黑則水精賊江河決賊處處  
起楊韓占云其象若竹彗木條長短無常  
長大見久則災深短小見不久則災狹也 ○衛公孫鞅

入秦

秦孝公令國中曰昔我穆公自岐雍之間修德行武  
東平晉亂以河為界西霸戎翟廣地千里天子致伯  
諸侯畢賀為後世開業甚光美會往者屬躁簡公出  
子之不寧國家內憂未遑外事三晉攻奪我先君河  
西地醜莫大焉獻公即位鎮撫邊境徙治櫟陽且欲  
東伐復穆公之故地修穆公之政令寡人思念先君

之意常痛於心賓客羣臣有能出奇計彊秦者吾且尊官與之分土於是衛公孫鞅聞之乃西入秦鞅衛之庶孫也好刑名之學事魏相公叔痤痤知其賢未及進會病魏惠王往問之曰公叔病如有不可諱將奈社稷何公叔曰痤之中庶子衛鞅年雖少有奇才願君舉國而聽之王嘿然公叔曰君即不聽用鞅必殺之無令出境王許諾而去公叔召鞅謝曰吾先君而後臣故先為君謀後以告子子必速行矣鞅曰君不能用子之言任臣又安能用子之言殺臣乎卒不能去王出謂左右曰公叔病甚悲乎欲令寡人以國聽衛鞅也既又勸寡人殺之豈不悖哉鞅既至秦因嬖臣景監以求見說以富國彊兵之術孝公大悅與議國集覽岐雍岐周文王所封邑漢為扶風郡隋改岐州唐改鳳翔府括地志云岐山在岐州岐山縣東北十里雍扶風雍縣也以有東轂西漢南商北居庸四山之所擁翳故名曰雍天子致伯秦本紀孝



公十九年天子始封爵為伯正義曰伯音霸公羊傳  
成八年其稱天子何注云天子者爵稱也聖人受命  
皆天所生故謂之天子疏解云案辨名記天子無爵  
而以天子為爵稱者言爵醺也所以醺盡其材天子  
有聖德居無極之尊位謂之爵稱亦何傷而云無爵  
者謂無如諸侯以下九命之爵耳豈謂無尊美之爵  
乎記郊特牲云古者生無爵死無諡天子有諡有爵  
明矣往者厲躁簡公出子之不寧自厲共公躁公簡  
公至出子其間懷公自殺出子被殺故曰不寧也秦  
本紀曰秦以往者數易君君臣乖亂櫟陽蘇林曰櫟  
音藥徐廣曰櫟陽漢萬年縣也括地志云櫟陽故城  
一名萬年城在京兆櫟陽縣東北分土分扶問反凡  
裂土以封諸侯其受封者各有分也公孫鞅公孫氏  
也鞅名也音倚兩反秦封鞅商於十五邑號曰商君  
公叔座公叔氏也座名也音在戈反如有不可諱戰  
國魏策注死者人之所不能避故云中庶子戰國魏

策作衛庶子注此公族官別於國官及太子官嬖臣景監嬖臣便幸近習也景監姓名楚之族監去聲

**正誤**

天子致伯今按秦自襄公救周送王東遷有功封為諸侯穆公伐晉春秋已書秦伯何以曰孝

公始封為伯也孝公十九年天子致伯乃質實志云方伯之伯周禮九命作伯謂諸侯之長也

**質實**

一統

岐古之邑名即太王所居岐周之地春秋戰國為秦地始皇并天下以屬內史漢初更為中地郡尋更為右扶風三國魏改為扶風郡晉為秦國後魏改置秦平郡尋改為岐州西魏改為岐陽郡隋初為岐州後改為扶風郡唐初復為岐州後改為鳳翔府宋因之屬秦鳳路金置天興軍元為鳳翔路本朝復為鳳翔府屬陝西道雍古之邑名本召穆公之采邑春秋時為故雍秦置雍縣漢屬右扶風後魏為秦平郡治隋為扶風郡治唐至德初改為鳳翔縣仍析置天興縣後省鳳翔入天興金復改為鳳翔縣元仍舊本朝因

之屬鳳翔府櫟陽秦之縣名屬內史漢高帝初都於此既葬太上皇於萬年陵遂分櫟陽置萬年縣治櫟陽城中故又名萬年城今廢為鎮故城在西安府臨潼縣北五十里

書法

上書見西方下書入秦鞅之為彗大矣東諸侯其憂乎通鑑是年不書彗見綱目特取而

書之

其旨微矣書彗始此終綱目書彗十有七是

年周赧王十年十二年秦始皇三十三年漢景帝

二年莽癸酉年晉成帝咸康二年孝武帝寧康元

年安帝義熙十四年陳文帝乙酉年唐高宗總章

元年睿宗太極元年文宗開成二年懿宗咸通五

年昭宗大順二年昭宣帝天祐二年後唐癸未年

書字五十三則彗

之為變非字比矣

發明

天人相應之機至不可誣也自聖經災異之書絕筆於獲麟之後泯泯勢勢至于戰國亂

離瘼矣天變於上民病於下不可一端舉也今也  
上書彗星見西方下書衛鞅入秦何哉蓋秦自用  
鞅之後奮其餘烈日肆虎狼之毒吞噬列國凡上  
世神明之胄掃殄無遺原野厭人之肉川谷流人  
之血災變之形孰有大於此者不惟是也廢井田  
開阡陌罷封建置守宰舉先王之典籍盡畀之烈  
焰之中自昔三代數聖人良法美意掃地不存其  
為彗也大矣星變之烈豈偶然哉然則鞅乃西方  
之彗出而掃滅宇內者爾通鑑是年不載彗星之  
出綱目取諸遷史年表特筆于此盖有深意存乎  
其間君子不  
可不察也

辛酉九年

壬戌十年秦以衛鞅為左庶長定變法之令

衛鞅欲變法秦人不悅鞅言於孝公曰夫民不可與  
慮始而可與樂成論至德者不和於俗成大功者不  
謀於衆是以聖人苟可以彊國不法其故甘龍曰不  
然因民而教者不勞而成功緣法而治者吏習而民  
安之衛鞅曰常人安於故俗學者溺於所聞以此兩  
者居官守法可也非所與論於法之外也智者作法  
愚者制焉賢者更禮不肖者拘焉公曰善乃以鞅為  
左庶長卒定變法之令令民為什伍而相收司連坐  
不告姦者要斬告姦者與斬敵首同賞匿姦者與降  
敵同罰民有二男以上不分異者倍其賦有軍功者  
各以率受爵為私鬪者各以輕重被刑大小僇力本  
業耕織致粟帛多者復其身事末利及怠而貧者舉  
以為收孥宗室非有軍功論不得為屬籍明尊卑爵  
秩等級各以差次名田宅臣妾衣服有功者顯榮無  
功者雖富無所芬華令既具未布恐民之不信乃立  
三丈之木於國都南門募民能徙置北門者予十金

民怪之莫敢徙復曰能徙者予五十金有一人徙之輒與五十金乃下令令行期年民之國都言新令之不便者以千數於是太子犯法衛鞅曰法之不行自上犯之太子君嗣不可施刑刑其傅公子虔黥其師公孫賈明日秦人皆趨令行之十年道不拾遺山無盜賊民勇於公戰怯於私鬪鄉邑大治秦民初言令不便者有來言令便鞅曰此亂法之民也盡遷之於邊其後民莫敢議令司馬公曰夫信者人君之大寶也國保於民民保於信故古之王者不欺四海霸者不欺四鄰善為國者不欺其民善為家者不欺其親不善者反之是以上下離心以至於敗所利不能藥其所傷所獲不能補其所亡豈不哀哉商君以刻薄之資處攻戰之世猶且不敢忘信以集覽為什伍而畜其民況為四海治平之政者哉

集覽

為什伍而相收司連

坐索隱曰什伍者五家為保十家相連收司相糾發也一家有罪九家舉發若不糾舉則十家連坐正義

曰司管也為什伍之法使之相收相管以率受爵率與律同復其身復音福除也謂除免其身役事末利事務也末利工商也蓋農桑為本故上文云本業耕織舉以為收孥孥妻子也索隱曰謂糾舉而收錄其妻子沒為官奴婢論不得為屬籍論平聲議法也謂宗室若無軍功則不得入宗屬之籍名田宅臣妾衣服案商君本傳此句之下有以家次三字對上句以差次或以名字作上句讀誤矣索隱注謂各隨其家爵秩之班次不使僭侈踰等也漢武帝時董仲舒言宜限民名田以贍不足杜佑通典注名田占田也各為立限不使富者過制則貧弱者可足也漢哀帝初丞相孔光大司空何武奏請諸侯王列侯公主皆得名田國中列侯在長安公主名田縣道及關內侯吏民名田皆毋過三十頃諸侯王奴婢二百人列侯公主百人關內侯正誤也猶差等也名田宅臣妾衣服吏民三十人

今按通鑑節去三字則此句當蒙上文各以差次四字通為一句

書法

綱目書律令多矣書省書正書更定書議定書新律令未有書變法者書變法何罪首變

古也故書衛鞅而削其族綱目書律令之變二十五秦王戌年變法令漢惠帝四年省法令武帝元光五年定律令成帝河平元年省律令晉甲申年賈充正法律宋辛卯年魏更定律令丁巳年再書己未年高允議定辛未年魏更定齊律書成癸未年梁頒新律梁甲申年魏更定庚午年齊定律癸未年周頒大律丁酉年周頒刑書己亥年周作刑經辛丑年隋初行新律癸卯年隋更定律大業三年頒新律戊寅年唐定律令貞觀元年更定十一年定律令五代庚午年梁定律令癸未年唐復舊律令丁巳年周作刑

統書變法者一而已



癸亥十一年

韓昭侯元年

秦敗韓師于西山

甲子十二年

乙丑十三年

丙寅十四年齊魏會田于郊

魏惠王問齊威王曰齊亦有寶乎威王曰無有惠王曰寡人國雖小尚有徑寸之珠照車前後各十二乘者十枚豈以齊大國而無寶乎威王曰寡人之所以為寶者與王異吾臣有檀子者使守南城則楚人不敢為寇有盼子者使守高唐則趙人不敢東漁於河有黔夫者使守徐州則燕趙之人從而徙者七千餘家有種首者使備盜賊則道不拾遺此四臣者將照千里豈特十二乘哉惠王有慚色

集覽

郊漢

書呂產封郊索隱曰郊縣屬沛郡一作浹音下交反  
檀子檀姓也史失其名索隱曰古者大夫皆稱子南  
城縣名屬泰山盼子田盼也高唐本博州縣今改州  
屬東昌路黔夫姓名黔音渠金反徐州索隱曰即薛  
縣也徐音舒非九州之徐春秋作舒州賈逵曰說文  
作邾邾在薛縣是也郡國志魯國薛縣六國時曰徐  
州紀年曰梁惠王下邳遷于薛故名徐州則徐與邾  
並音舒正義曰徐州齊西北界上地名也在渤海東  
平縣種首名也史摭實一統志云高唐春秋齊之邑  
失其姓種上聲摭實名漢始置縣屬平原郡後魏  
置南清河郡北齊罷郡隋初以縣屬貝州後屬清河  
郡唐改為崇武縣後復為高唐縣屬博州五代梁改  
魚丘縣後唐復舊晉改齊城縣漢復為高唐縣宋金  
仍屬博州元初屬東平路至元中改為州本朝因之  
屬東昌府

書法

會不言故言故醜辭也書會田于郊醜之也書田始此終綱目書田三

主唐穆宗長慶二年書獵十三漢武帝元鼎五年

成帝元延三年桓帝永興二年延熹元年六年靈

帝光和五年宋癸卯年唐太宗貞觀五年十一年

十六年後唐甲申年再獵乙酉年凡田獵譏也惟

魏太武唐太

宗非譏辭

丁卯十五年秦敗魏師于元里取少梁○魏伐趙圍邯鄲

戊辰十六年齊伐魏以救趙魏克邯鄲還戰敗績

初孫臏與龐涓俱學兵法涓仕魏為將軍自以能不及臏乃召之至則斷其足而黥之欲使終身廢棄齊使者至魏臏陰見之使者竊載以歸田忌客之進之威王威王問兵法遂以為師至是謀救趙以臏為將

辭以刑餘之人不可乃使田忌為將而孫子為師居輜車中坐為計謀忌欲引兵之趙孫子曰夫解離亂紛糾者不控拳救鬪者不搏撻批亢擣虛形格勢禁則自為解耳今梁之輕兵銳卒竭於外而老弱疲於內若引兵疾走其都彼必釋趙而自救是我一舉解趙之圍而收弊於魏也忌從之十月邯鄲降魏魏師還與齊戰於桂陵魏師大敗

集覽

解離亂紛糾者不控拳孫子本傳拳作捲索隱曰謂事之雜亂

紛糾也解之者當善以手解之不可控捲而擊之案捲即拳劉氏釋云控總捲縮非也救鬪者不搏撻索隱曰謂救鬪者當善撝解之母以手助相搏撻則其怒益熾矣案撻謂以手持撻刺人也批亢擣虛索隱曰批白結反相排批也亢拒也擣擊也衝也虛空也謂敵人相亢必須批之彼兵若虛則衝擣之欲令田忌擊梁之虛也形格勢禁則自為解耳索隱曰謂若批其相亢衝擣彼虛則是事形相格而其勢自禁止

則彼自為解兵也格正誤下文救闕者不搏擻意重

音閣歧閭不得行也

孟康云拳與綦同區願切攘臂繩也漢書註攘臂猶

捋臂也解雜亂紛糾者不控拳蓋以理亂絲為喻言

雜亂紛糾者當徐解之不可急持拘捋也猶左傳言

治絲而棼之搏擻今按搏手擊也擻拘持也批亢今

按亢本喉肱字居郎切衿要之處也漢書婁敬云與

人鬪不搯其亢拊其背未能全其勝也音義皆同批

反擊也史記批其逆鱗亦謂龍喉下有逆鱗也此言

批亢謂擊其要處也下文云引兵疾走其都即要處

也若彼亢拒而我擊之則與擣虛之義不侔矣

# 韓伐東周取陵觀廩丘集覽

陵觀地名在兗州境劉伯莊曰觀工喚反廩丘地理

志兗州有廩丘縣史記韓世家作撫實一統志云廩丘

邢丘邢丘注見赧王四十九年周之邑名春秋

時屬齊戰國時屬韓漢置廩丘縣屬高平郡三國魏及晉宋皆因之隋省入鄆城縣故城在東昌府范縣義東堡春秋齊烏餘以廩丘奔晉又曹魏移兖州於廩丘即此

己十七年秦伐魏 ○諸侯圍魏襄陵集覽 襄陵河東有

平陽 撫實 一統志云襄陵晉大夫卻犂之食邑名以襄陵在此因名漢始置襄陵縣屬河東郡魏

屬平陽郡後魏分置擒昌縣北齊移擒昌治此隋復為襄陵縣唐徙治於汾水之西五代晉屬絳州改屬河中府宋屬晉州金屬平陽府元仍舊本朝因之改屬平陽府

庚午十八年秦伐魏 ○韓以申不害為相

申不害者鄭之賤臣也學黃老刑名以干韓昭侯昭侯用以為相內修政教外應諸侯十五年終申子之

知國家之待有  
功自當鄭重其  
事如彤弓弘兮  
受言藏之可也  
敝袴之微母乃  
近於鄙陋乎裡  
以不借賞目之  
似非確論

身國治兵彊申子嘗請任其從兄昭侯不許申子有  
怨色昭侯曰所謂學於子者欲以治國也今將聽子  
之謁而廢子之術乎抑其行子之術而廢子之請乎  
子嘗教寡人修功勞視次第今有所私請將奚聽乎  
申子乃辟舍請罪曰君真其人也昭侯有獎袴命藏  
之侍者曰君亦不仁者矣不賜左右而藏之昭侯曰  
吾聞明主愛一嚔一笑嚔有為嚔笑有集覽學黃老  
為笑今袴豈特嚔笑哉吾必待有功者刑名申  
不害本傳申子之學本於黃老而主刑名索隱曰黃  
老之法清簡無為君臣自正黃帝之言無傳矣老聃  
之書有八十一篇刑撫實一統志云申  
名注見漢景帝元年不害京人

辛未 十九年秦徙都咸陽始廢井田

衛鞅築冀闕宮庭於咸陽徙都之令民父子兄弟同  
室內息者為禁并諸小鄉聚集為一縣縣置令丞凡

三十一縣廢井田開阡陌平斗桶權衡丈尺

集覽

冀闕正義曰冀記也記列教令當於此門闕也

闕在門兩旁中央闕然為道崔豹古今注云人臣至此則思其所闕蓋為二臺於門外作樓觀於上上圓下方以其縣法謂之象魏象治象也魏者其狀巍然高大使民觀之因謂之觀兩觀雙植中不為門是觀與象魏闕一物而三名咸陽漢高更名新城漢武更名渭城今長安是關中記秦孝公都咸陽今渭城是始皇都咸陽今城南大城是山南曰陽水北亦曰陽其城在渭水北又在九嵎諸山之南故名咸陽同室內息者為禁息止也秦俗父子兄弟同室居止鞅始更為制而禁之開阡陌路南南北曰阡東西曰陌正義曰案謂驛塍也平斗桶權衡桶音勇字通作甬量器名今之斛也稱錘曰權稱上曰衡權與物鈞而生衡所以知物輕重記月令仲春角正誤開阡陌今按朱斗甬注角平之也仲秋平權衡正誤子曰阡陌便是



井田一橫一直如遂上有塗便是陌洫上有路便是阡自阡陌之外有地則又閒在那裏先王所以如此者乃是要正經界恐人相侵占今商鞅却破開了遇可作田處便作田更不要整齊這開字非開創之開乃開闢也撫實一統志云咸陽秦之縣名孝公徙都於之開也此其地在山南水北山水皆陽故名咸陽漢初曰新城縣元鼎初改渭城縣東漢省晉時石勒於此置石安縣後苻秦置咸陽郡隋郡廢唐復為咸陽縣屬京兆郡宋金仍舊元省入興平縣尋復置縣本朝因之改屬西安府

書法

書始何罪首變古也凡立法有變古為民害者必書始若初

發明

井田上世之良法也自黃帝畫埜分州更唐虞夏商周而法始大備前世論之詳矣鞅獨

何人乃舉而廢之又從而更賦稅之法其變古之罪不可勝誅然綱目皆以秦書而不以鞅書者蓋

變法者鞅而用鞅者秦也澄源正本首惡必歸於秦秦亦安得而辭哉其旨嚴矣

壬申二十年

趙肅侯元年

癸酉二十一年秦更賦稅法

甲戌二十二年

乙亥二十三年衛貶號曰侯服屬三晉

初子思言苟變於衛侯曰其材可將五百乘公曰吾知其可將然變嘗為吏賦於民而食人二雞子故弗用也子思曰夫聖人之官人猶匠之用木也取其所長棄其所短故杞梓連抱而有數尺之朽良工不棄今君處戰國之世選爪牙之士而以二卵棄千城之將此不可使聞於鄰國也衛侯言計非是而羣臣和

者如出一口子思曰以吾觀衛所謂君不君臣不臣者也公丘懿子曰何乃若是子思曰人主自臧則衆謀不進事是而臧之猶却衆謀况和非以長惡乎夫不察事之是非而悅人讚己閭莫甚焉不度理之所在而阿諛求容諂莫甚焉君閭臣諂以居百姓之上民不與也若此不已國無類矣子思言於衛侯曰君之國事將日非矣公曰何故子思曰有由然焉君出言自以為是而卿大夫莫敢矯其非卿大夫出言亦自以為是而士庶人莫敢矯其非君臣既自賢矣而羣下同聲賢之賢之則順而有福矯之則逆而有禍如此則善安從生詩曰具曰予聖誰知烏之雌雄抑亦似君之君臣乎

**集覽**

干城之將詩兔置篇

公侯干城注干扞也箋云干也城也皆以禦難也謂可任以干城其民干如字孫炎注干楯所以自蔽扞也舊音戶旦反左傳注

謂扞蔽其民若城然

書法

衛故侯爵也不書曰復而曰貶何著其心也自卑以求媚於人則不足以言復矣

發明

衛自康叔受封固侯爵也至是乃始貶號曰侯何哉蓋春秋列國率皆僭號稱公如鄭伯

邾子杞男之類甚至葉以楚之屬縣亦稱曰公今馬衛之自貶特迫於勢之微弱求為取容之地爾彼韓趙魏乃晉之大夫衛與晉為兄弟之國其視三家則其外臣也甘為服屬不亦傷乎然三家尚能併晉而有之又何有於衛哉特其土地褊小不足以動三晉之心不然豈貶號所能免耶特筆書此亦足見強大之凌弱小而微者之不能自立其亦可哀也已

丙子二十四年

丁丑二十五年諸侯會于京師集覽

京師公羊傳京者何大也師者何衆也天

子之居必以衆  
大之辭言之

書法

會于京師何非朝也天威咫尺而莫之朝焉  
以是為不恭故書諸侯不序略之也據濁澤

之會諸

侯皆序

戊寅二十六年致伯于秦諸侯賀之秦使公子少官帥師

會諸侯來朝

書法

諸侯何以不序略之也來朝也其略之何秦  
所使也往年會于京師矣未嘗朝也朝覲諸

侯之常禮而待命於人以是為不恭故略之也書  
曰秦使公子少官帥師會諸侯來朝屬辭比事而  
諸侯之慢秦之強可見矣已受諸侯之賀而使大  
夫朝周秦之不王孰甚焉然則曷為書會諸侯不

以大夫主諸侯也綱目之修君臣之分而已自入  
綱目至周亡凡六王百四十八年其來朝者二烈

王六年周

衰甚矣

發明

秦至是蓋益強矣致伯于秦周之取容也帥  
師會侯秦之脅制也比而書之周秦之情見

矣

己卯二十七年

案史記是年齊宣王元年通鑑與史記不  
同而考異不載其說未詳所據後湣王元

年放此

庚辰二十八年魏伐韓齊伐魏以救韓殺其將龐涓虜太

子申

魏使龐涓伐韓韓請救於齊齊威王召大臣而謀之  
成侯鄒忌曰不如勿救田忌曰不救則韓且折而入  
於魏矣不如蚤救之孫臏曰夫韓魏之兵未弊而救  
之是吾代韓受魏之兵顧反聽命於韓也且魏有破  
國之志韓見亡必東面而愬於齊吾因深結韓之親  
而晚承魏之弊則可以受重利而得尊名也王曰善  
乃陰許韓使而遣之韓因恃齊五戰不勝而東委國  
於齊齊因起兵使田忌將孫子為師以救韓直走魏  
都龐涓聞之去韓而歸魏人亦大發兵使太子申將  
以禦齊師孫子曰彼三晉之兵素悍勇而輕齊齊號  
為怯善戰者因其勢而利導之兵法百里而趣利者  
蹶上將五十里而趣利者軍半至乃使齊軍入魏地  
為十萬竈明日為五萬竈又明日為二萬竈龐涓行  
三日大喜曰我固知齊軍怯入吾地三日士卒亡者  
過半矣乃棄其步軍率輕銳倍日并行逐之孫子度  
其暮當至馬陵馬陵道陁而旁多阻隘可伏兵乃斫

大樹白而書之曰龐涓死此樹下令萬弩夾道而伏期日暮見火舉而俱發涓果夜至見白書以火燭之讀未畢萬弩俱發魏師大亂涓乃自刎曰遂成豎子之名齊因乘勝大敗魏師虜太子申集覽上將魏武帝曰蹇挫也索隱曰蹇居月反劉氏云蹇斃也大將軍必致僵仆馬陵徐廣曰在魏州元城東南十里正義曰虞喜志林云濮州鄆城東北六十里有陵澗谷深峻可以置伏案龐涓敗在此徐說非實一統志云馬陵道名在大名府城東南一十里

辛巳二十九年秦衛鞅伐魏誘執其將公子卬而敗之魏

獻河西地於秦徙都大梁秦封鞅為商君考異

提要無於秦二

字



衛鞅言於孝公曰秦之與魏譬若人有腹心之疾非  
魏并秦即秦并魏何者魏居嶺阨之西都安邑與秦  
界河而獨擅山東之利利則西侵秦病則東收地今  
以君之賢聖國賴以盛而魏往年大破於齊諸侯叛  
之可因此時伐魏魏不支秦必東徙然後秦據河山  
之固東鄉以制諸侯此帝王之業也公從之使鞅將  
兵伐魏魏使公子卬將而禦之軍既相距鞅遺卬書  
曰吾始與公子驩今俱為兩國將不忍相攻欲與公  
子面相見盟樂飲而罷兵以安秦魏之民卬以為然  
乃與會盟而飲鞅伏甲襲卬虜之因大破魏師魏惠  
王恐獻河西地於秦以和因去安邑徙大梁乃歎曰  
吾恨不用公叔之言秦封鞅商於十五邑號曰商君  
胡氏曰使鞅而可殺殺鞅而魏長無患未害為殺無  
罪以利己仁者不為也况天下不止一鞅可勝殺乎  
惠王不恨不用孟子之言而以不集覽大梁本地名  
用公叔之言為恨其亦可謂愚矣集覽大音泰正義

曰從蒲州安邑徙都大梁今汴州浚儀大梁亭是商於十五邑索隱曰商於皆在弘農正義曰古商國今商洛縣是在商州東九十里於在鄧州內鄉縣東七里案十五邑近此二邑未害為句絕言為此亦無傷也

正誤

未害為殺無罪以利己今按此九字當為一句而貫下文言於殺無罪以利己仁者不為

之義無傷也

撫實

此號為大梁秦為三川郡地漢為陳留

郡地晉改為陳留國東魏改置梁州後周改為汴州隋廢之以其地併入滎陽等郡唐武德初置汴州天寶初復為陳留郡乾元初又為汴州興元初徙宣武軍治此五代梁都此號東京開封府後唐復為汴州晉漢周皆為東京開封府宋因而都之金陞為汴京後復都焉元改汴梁路本朝仍為開封府屬河南道

書法

誘執何譏譎也書誘執始此終綱目書誘執五是一年公子印報王十六年楚君槐五十六

年公子勝梁辛未年江安侯國正唐元和五年盧從史而秦居其三焉秦之譎甚矣

發明

秦尚功首虜之國也疾驅力戰類皆無名之師至是伐魏誘執其將則詐謀為益甚矣鞅

以是而受封秦以是而賞功書之詳詞之複所以著秦氏君臣之罪而非誇其戰伐也鞅之詐謀若此而猶欲以徙木予金為示信之舉何哉雖然徙木予金亦詐謀也

齊趙伐魏

壬午三十年

楚威王  
商元年

癸未三十一年秦伯卒秦人誅衛鞅滅其家

孝公薨太子立是為惠文王公子虔之徒告商君欲反發吏捕之商君出亡欲止客舍舍人曰商君之法

舍人無驗者坐之商君歎曰為法之弊一至此哉去  
之魏魏人不受內之秦秦人攻殺之車裂以徇盡滅  
其家初商君用法嚴酷步過六尺者有罰棄灰於道  
者被刑嘗臨渭論囚渭水盡赤為相十年人多怨之  
嘗問趙良曰我治秦孰與五殺大夫賢良曰千人之  
諾諾不如一士之諤諤僕請終日正言而無誅可乎  
商君曰諾良曰五殺大夫荆之鄙人也穆公舉之牛  
口之下而加之百姓之上秦國莫敢望焉相秦六七  
年而東伐鄭三置晉君一救荆禍巴人致貢犬戎來  
服其為相也勞不坐乘暑不張蓋行於國中不從車  
乘不操干戈及其死也男女流涕童子不歌謠春者  
不相杵今君之見也因景監以為主其從政也陵轢  
公族殘傷百姓公子虔杜門不出已八年矣詩曰得  
人者興失人者崩此數者非所以得人也君之出也  
後車載甲多力而駢脅者為驂乘持矛而操闔戟者  
旁車而趨書曰恃德者昌恃力者亡此數者非恃德

也君之危若朝露而尚貪商於之富寵秦國之政畜  
百姓之怨而無變計秦王一旦捐賓客而不立朝秦  
國之所以收君者豈其微哉商君不聽居五月而難  
作胡氏曰鞅至是雖有變計亦無所施矣何則百姓  
者其讐也六國者其敵也惠文王之憾不可平公子  
虔之刑不可補商於叢爾之地不足以自蔽也欲圖  
善後之策亦無所為而可矣嗚呼刑

集覽

五殺大夫  
荆之鄙人

左傳僖五年晉執虞大夫井伯以媵秦穆姬晉世家  
作虜井伯百里奚正義曰南雍州記云百里奚字井  
伯宛人也宛屬楚楚初國于荊州故云荆案春秋初  
例稱荆僖公後始稱楚百里奚後亡走宛楚鄙人執  
之秦穆公以五殺羊皮贖之授以國政號五殺大夫  
或曰百里奚自賣五殺皮為人養牛以要秦故曰舉  
之牛口之下三置晉君索隱曰謂立晉惠公懷公文  
公也一救荆禍索隱曰案十二諸侯年表秦穆公二

十八年會晉伐楚朝周此云救荆禍未詳巴人注見漢獻帝建安二十年犬戎正義曰黃帝之後生并明并明生白犬是為犬戎也後漢書犬戎槃瓠之後今長沙武陵大半是童子不歌謠春者不相杵記曲禮上鄰有喪春不相里有殯不巷歌注助哀也相謂送杵聲以音聲自勸也闔戟索隱曰闔音吸戟之名也鄉誕生音吐臘反書曰恃德者昌恃力者亡索隱曰此是周書文也孔子所定之餘秦國之所以收君者豈其微哉索隱曰鞅於秦無仁恩故秦之將欲收鞅者其效甚明矣故云豈其微哉

書法

人衆辭也誅例有二書伏誅者重辭也直書誅者快辭也誅衛鞅誅陳豨誅產祿誅潁誅

史歆誅閭顯誅董卓誅馬騰誅步闡誅穎誅祖約誅張璠誅元鑒誅爾朱顯壽誅元載誅田希鑒誅

劉洸直書誅而削其官皆甚快之之辭也

發明吳起亦鞅之流也起書殺而鞅書誅是不惟楚羣臣有射中王尸之罪而起鞅之輕重亦可見矣蓋起之少恩足以亡其軀而鞅之詐力至於貽禍無窮固非起之比也然秦之於鞅用其詐以滅六國亦以自滅其國鞅之相秦用其詐以滅秦國亦以自滅其家明書于冊所以示天下萬世之戒嚴矣後之欲治商鞅之術者可不鑒諸

甲申三十二年

秦惠文王元年

韓申不害卒

書法

卒在位也綱目不皆卒大夫在位卒功卒賢卒盜賊書死獄死書死戰死書死死義書死

之

乙酉三十三年宋太丘社亡集覽

宋太丘社亡封禪書注索隱曰應劭云亡淪入

地非也亡謂社主亡也郭璞云宋有太丘社以社名此地也史記漢武本紀周德衰宋之社亡注正義曰社主民也社以石為之宋社即亳社也武王伐紂而立亳社以為監戒周德衰國將危明故宋之社為亡殷後也

○孟軻至魏

孟子鄒人名軻受業於孔子之孫子思是歲魏惠王卑詞厚禮以招賢者於是孟子至梁見惠王王曰叟不遠千里而來亦有以利吾國乎孟子曰君何必曰利亦有仁義而已矣君曰何以利吾國大夫曰何以利吾家士庶人曰何以利吾身上下交征利而國危矣未有仁而遺其親者也未有義而後其君者也惠王以為迂遠而闊於事情不能用也

書法

至無事不書此其書何特筆也鄒人也何以不書鄒據公孫鞅書衛天下之辭也何



丙戌三十四年秦伐韓拔宜陽

丁亥三十五年魏惠王

一年

司馬公曰史記六國表魏惠王三十六年薨襄王十六年薨哀王二十三年薨汲冢竹書紀年惠王三十六年改元稱一年後十六年薨杜預和嶠皆以為史記誤分惠王之世為二王之年蓋世本惠王生襄王而無哀王且竹書魏史所集覽汲冢竹書紀年索隱書必得其真故今從之曰王劭案紀年之書

多是偽謬晉武帝時汲郡人不準盜發魏襄王墓或言安釐王冢得竹書數十車其紀年十三篇書中與經傳大異者云夏年多殷益干啓位啓殺之太甲殺伊尹文王殺季歷自周受命至穆王百年非穆王壽百歲也幽王既亡共伯和者攝行天子事非二相共和也其書多燼簡斷札晉武乃詔東晉隨欸分釋之

不姓也音  
方鳩反

齊魏會于徐州以相王撫實

徐州注見唐昭宗景福二年泗州

書法

會言故醜辭也濁澤之會書求為諸侯安王十三年于郊之會書田顯王十四年徐州之

會書相王皆醜之也

按分注是歲魏惠王復改元稱一年則以稱王之故歟

# ○楚滅越

越王無彊伐齊齊說之使伐楚楚人大敗之盡取吳故地東至浙江越以此散諸公族爭立或為王或為君濱於海上而朝服於楚

戊子  
三十六年楚伐齊○韓侯卒

韓昭侯作高門屈宜白曰君必不出此門何也不時  
吾所謂時者非時日也夫人固有利不利時往者君  
嘗利矣不作高門前年秦拔宜陽今年旱君不以此  
時恤民之急而顧益奢此所謂時詘舉羸者也故曰  
不時至是門集覽屈宜白許慎曰楚大夫也時在魏  
成而昭侯薨顧益奢顧反也時詘舉羸徐廣曰  
言時衰耗而作奢侈

秦大敗魏師擒其將龍賈取雕陰集覽

雕陰魏地在龍門河西北地理

志上郡有雕陰縣括地志云故撫實

一統志云雕陰古邑名春秋時屬晉

戰國時屬魏後屬秦漢置雕陰縣屬上郡晉為赫連勃  
勃所居後魏於此置上郡又分置綏州隋初改為上州  
後改為雕陰郡唐初改為綏州天寶中改為上郡乾元  
初復為綏州宋改為綏德城元符初置綏德軍金復為

綏德州元仍舊本朝  
因之改屬延安府

○燕趙韓魏齊楚合從以擯秦以

# 蘇秦為從約長并相六國

初洛陽人蘇秦說秦王以兼天下之術不用乃去說  
燕文公曰燕之所以不被兵者以趙之為蔽其南也  
且秦攻燕戰於千里之外趙攻燕戰於百里之內夫  
不憂百里之內而重千里之外計無過於此者願王  
與趙從親天下為一則燕必無患矣文公從之資秦  
車馬以說趙肅侯曰當今之時山東之國莫彊於趙  
秦之所害亦莫如趙而秦不敢舉兵伐趙者畏韓魏  
之議其後也秦攻韓魏無名山大川之限稍蠶食之  
傳國都而止韓魏不能支秦必入臣於秦秦無韓魏  
之規則禍必中於趙矣臣以天下之圖按諸侯之地  
五倍於秦度諸侯之卒十倍於秦而衡人日夜務以  
秦權恐喝諸侯使之割地以事秦秦成則其身富榮

國被秦患而不與其憂故臣竊為大王計莫如一韓  
魏齊楚燕趙為從親以擯秦令其將相會盟洹水之  
上約曰秦攻一國則五國各出銳師以撓秦或救之  
有不如約者五國共伐之則秦甲必不敢出於函谷  
以害山東矣肅侯大悅厚賜賚之以約於諸侯秦乃  
說韓宣惠王曰韓地方九百餘里帶甲數十萬天下  
之彊弓勁弩利劍皆從韓出以韓卒之勇被堅甲蹠  
勁弩帶利劍一人當百不足言也大王事秦秦必求  
宜陽成臯今茲效之明年又復求割地與則無地以  
給之不與則棄前功受後禍且韓地有盡而秦求無  
已以有盡之地逆無已之求此所謂市怨結禍者也  
不戰而地已削矣鄙諺曰寧為雞口無為牛後夫以  
大王之賢挾彊韓之兵而有牛後之名臣竊為大王  
羞之韓王從其言秦說魏惠王曰大王之地方千里  
地名雖小而人民甚衆武士蒼頭奮擊各二十萬廝  
徒十萬車六百乘騎五千匹乃聽於羣臣之說而欲

臣事秦臣願大王熟計之也魏王聽之秦說齊王曰齊四塞之國地方二千餘里帶甲數十萬粟如丘山即有軍役不待發於遠縣而臨苗之卒已二十一萬矣夫韓魏之所以重畏秦者為與秦接境也兵出而相當不十日而存亡之機決矣幸而勝則兵半折四境不守不勝則國已危亡隨其後此韓魏所以重與秦戰而輕為之臣也秦之攻齊則不然倍韓魏過陽晉經亢父之險車不得方軌騎不得比行百人守險千人不敢過也秦欲深入則狼顧恐韓魏之議其後是故恫疑虛喝驕矜而不敢進則秦之不能害齊亦明矣不深料此而欲西面事之是羣臣之計過也願大王少留意計之齊王許之乃說楚威王曰楚天下之彊國也地方六千餘里帶甲百萬車千乘騎萬匹粟支十年此霸王之資也故秦之所害莫如楚楚之與秦其勢不兩立從親則諸侯割地以事楚衡合則楚割地以事秦此兩策者相去遠矣大王何居焉楚

王亦許之於是蘇秦為從約長并相  
六國北報趙車騎輜重擬於王者

集覽

傳國都而止傳音附

著也止謂兵止於此禍必中於趙中竹仲反戰國策  
注猶射中的也衡人如張儀之徒衡讀曰橫恐喝索

隱曰喝許曷反相恐脅也鄒氏音憇義疎身富榮句

絕擯秦正義曰擯棄也史記作賓秦案禮金路以賓

賓讀作擯義異音同故史記借用索隱注為賓客之

賓誤洹水相州縣名後屬魏州左傳注洹水出汲郡

林慮縣東北至魏郡長樂縣入清水洹音桓今土俗

音袁應劭曰在湯陰界瓚曰在今安陽縣北撓秦撓

音女巧反又火高反擾也亂也效之效獻也寧為雞

口母為牛後戰國策作寧為雞尸不為牛從延篤注

尸主也從牛子也言寧為雞中之主不為牛子之從

後也鮑彪較注云沈括辯亦以為雞尸牛從案蘇秦

稱牛後者蓋故以惡語侵韓欲威侯怒而從之耳雞

尸牛從謬誤也正義曰雞口雖小猶能進食牛後雖

大乃出糞也蒼頭顏師古曰長大有脅力者之號項羽傳異軍蒼頭應劭曰言其與衆異也蒼頭謂若赤眉青領以相別也戰國策魏有蒼頭二十萬如淳曰蒼頭魏兵卒之號也晉灼曰殊異其軍為蒼頭謂著青帽也廝徒廝養馬之賤者也徒僕隸也四塞塞先代反高誘曰四面有山關之固故曰四塞亢父鄭德曰音亢甫索隱曰亢舊音剛劉伯莊包愷並音苦浪反地理志東平亢父縣括地志云故城在兗州任城縣南五十里方軌爾雅方舟者併兩舟則此軌亦兩也猶言並轍也比行比毗義反聯次也行胡剛反列也狼顧狼性怯走喜回顧疑虛喝索隱曰恫音通恫疑恐懼貌虛喝喘息亦懼貌戰國策注高誘曰恫痛也言疑之甚喝訶也秦自疑懼不敢進兵故作恐怯之詞以紿韓魏霸王王于況反後倣此輜重輜載衣車重載物車顏師古曰行者之資總曰輜重正義曰輜廁也謂軍糧什物雜廁載之以其累重故曰輜



重正誤

四塞今按塞悉則切四塞四面皆充實也  
疑虛喝今按喝高誘訓訶為是謂以虛詞訶

也脅撫實

時為魏武侯別都漢置魏縣屬魏郡晉因之  
一統志云洹水周之地名春秋時屬晉戰國

北齊省入昌樂縣隋初復置隸武陽郡唐隸魏州宋  
屬大名府金元仍舊本朝因之屬大名府亢父古邑  
名春秋屬魯戰國屬楚漢置亢父縣屬東平國三國  
魏及晉宋皆仍舊隋省之故城在兗州府濟寧州南  
六十里

書法

以為長何著六國之志也至連衡則書秦使  
張儀說之矣從橫之說童子羞之此何以書

見從約之不可恃也君子之闢異端也著其說而  
不沒其實則不待貶而人知其為非是故燕趙韓  
魏齊楚合從以擯秦以蘇秦為從約長則書秦使  
張儀說楚韓齊趙燕連衡以事秦則書然則為六

國者宜何如孟子曰省刑罰薄稅斂深耕易耨以下此其道矣

發明

昔蘇軾有言蘇秦之為從也合天下之異以

當是時也秦人併吞之勢已形六國之君皆不能如孟子所謂行仁政修忠信以撻其堅甲利兵則為目前救急之計者捨合從之外亦未有他策蘇秦適逢其機故不旋踵遂合于一惜乎秦之為謀徒能捭闔其說以利而陷六國爾天下大勢利害所在彼固不能深言之也綱目書此則若六國之自合從而不言蘇秦之說者亦以示當時之勢不容不合爾然未幾繼書從約皆解于下則以見秦特偷取一時之富貴非真能為六國深謀遠慮者學者比而觀之則知詐謀游說果不足恃而合從連衡之事果非君子之所當尚也歟

己丑三十七年

燕易王韓宣惠王齊宣王辟疆元年

秦以齊魏之師伐趙蘇

秦去趙適燕從約皆解考異

提要書曰秦及齊魏伐趙從約皆解

秦使公孫衍欺齊魏以伐趙趙肅侯讓蘇秦秦恐請使燕必報齊乃去趙而從約皆解

書法

以者何易辭也前年六國合從齊魏在焉至是踰年耳秦得以其師伐趙合之何難敗之

何易哉勢則然也故上書燕趙韓魏齊楚合從以擯秦以蘇秦為從約長下書秦以齊魏之師伐趙雖間有事不書所以著從約之不可恃也  
報王四年繼書秦君卒諸侯復合從

魏以陰晉為和於秦集覽

陰晉地理志華州華陰縣春秋魏陰晉也秦惠文王更名

寧秦漢高撫實改名華陰

一統志云陰晉古地名春秋時屬晉戰國時屬魏秦改曰寧秦漢始置華陰縣

以在華山之陰故名唐分置潼津縣尋省入華陰垂拱初改僊掌縣神龍中復曰華陰寶歷中改太陰縣後復為華陰縣宋金元仍舊本朝因之改屬西安府

寔華陰

齊伐燕

庚寅三十八年

辛卯三十九年秦伐魏魏獻少梁河西地於秦

壬辰四十年秦伐魏取汾陰皮氏拔焦集覽汾陰地理志河東汾陰縣

括地志云今蒲州縣其故城俗名殷湯城在汾陰北九里皮氏地理志河東有皮氏縣括地志云即絳州龍門

縣故城在龍門西北三十步焦地理志弘農陝縣有焦城括地志云古焦國在陝縣東北百步古虢城中東北隅因焦水為名武王克商封神農之後於焦

撫實

一統志云汾陰戰國時魏邑名漢置汾陰縣屬河東

郡晉時劉淵省入蒲坂縣後魏復置屬汾陰郡隋屬河東郡唐初屬秦州尋改屬蒲州開元中改寶鼎縣宋真宗祀汾陰改曰榮河縣置慶成軍尋廢以縣屬河中府金置榮州元仍為榮河縣本朝因之改屬平陽府皮氏春秋時晉邑名戰國時屬魏秦置皮氏縣漢屬河東郡魏晉皆屬平陽郡後魏改龍門縣及置龍門郡隋初郡罷以縣屬蒲州唐置秦州貞觀中州廢以縣屬絳州元和初屬河中府宋宣和初改為河津縣金屬榮州後復屬河中府元仍舊本朝因之屬平陽府焦古邑名以焦水為名周武王克商封神農之後於此為焦國春秋時屬晉戰國時屬魏後屬秦漢置焦縣屬弘農郡東漢省之故城在河南府陝州東北三十里

○宋公

弟偃逐其君剔成而自立

癸巳四十年

楚懷王  
槐元年

秦客卿張儀伐魏取蒲陽既而歸

之魏盡入上郡以謝秦以儀為相

張儀者魏人與蘇秦俱事鬼谷先生學從橫之術游諸侯無所遇蘇秦召而辱之儀怒入秦秦王說之以為客卿至是將兵伐魏取蒲陽言於秦王請復以與魏而使公子繇質焉儀因說魏王曰秦之遇魏甚厚魏不可以無禮於秦魏因盡入上郡十五縣以謝秦儀歸而相秦

集覽

鬼谷先生風俗通曰六國

時從橫家索隱曰鬼谷地名扶風池陽潁川陽城並有鬼谷墟蓋其所居因號焉樂臺注鬼谷子云蘇秦欲神秘其道故假名事鬼谷也羣書考索曰鬼谷先生周時高士姓名不聞以其所隱地名自號焉蘇

張師之授以捍闔分其書三卷蒲陽今河東蒲阪縣是也魏世家秦拔我蒲陽括地志云蒲邑故城在隰州隰川縣南四十五里居蒲水北故名蒲陽又蒲阪注見赧王十二年質馬句絕質音致正義曰國彊欲待弱之來相事故遣子及貴臣往為質此音陟利反國弱懼其侵伐令子及貴臣往為質此音直實反二國敵亦為交質此音致如左傳王子狐正誤使公子為質於鄭鄭公子忽為質於周是也

今按質字以彊弱分二音使在一句內如左傳周鄭交質之類宜何音要之質子為質之質皆當讀若致

撫實

一統志云鬼谷先生春秋晉平公時人姓王名詡嘗入雲氣山採藥得道顏如少童居清溪之

鬼谷蘇秦張儀嘗問道三年辭去詡曰二子輕松喬之永壽貴一旦之浮榮惜哉鬼谷處人間數百歲後不知所之或曰嵩高之陽城亦有鬼谷又按鬼谷地名在河南府登封縣北百里史記蘇秦洛陽人事師

於齊而習於鬼谷即此蒲陽春秋時晉邑名以居蒲水之北故名戰國時屬魏秦屬河東郡漢為蒲坂縣後魏改置河東郡後周改為蒲州隋復為河東郡治河東縣唐初改為蒲州屬河東道開元中改為河中府五代梁置護國軍節度宋仍舊屬陝西路金為蒲州尋改為河中府元因之本朝復為蒲州屬平陽府

**書法**

齊伐燕取十城已而歸之不書三十七年此書之何著秦譎也秦蓋屢用之矣故取蒲陽

既而歸之則書歸焦曲沃於魏則書復與楚上庸則書復與魏蒲坂則書皆所以著其譎也

甲四十二年秦縣義渠集覽

義渠索隱曰古西戎國與趙魏接境有二十五城秦

昭王滅之括地志云今寧涇慶三州本其地案地理志北義渠道也秦置北地郡

**撫實**

一統志云義渠

春秋時義渠戎之國名秦滅義渠以其地置義渠縣屬北地郡漢因之東漢至晉復陷於戎後魏置朔州隋改



為弘化郡唐初置慶州天寶初改為安化郡至德初改曰順化郡尋陞為安定軍五代梁改武靜軍宋初為慶州後陞為慶陽軍金改曰安國軍後置慶元路元為慶陽府本朝因之隸陝西道

○秦歸焦曲

沃於魏考異

提要書曰秦歸魏焦曲沃

集覽

曲沃地理志河東曲沃縣漢武改名聞喜括地

志云曲沃故城在陝州陝縣西南三十二里今曲沃店是質實一統志云曲沃春秋時晉邑名戰國時屬魏秦漢為河東郡絳縣地晉屬平陽郡後魏置曲沃縣屬正平郡後周治樂昌堡隋屬絳州又移治絳邑故城北唐宋金元皆因之本朝改屬平陽府

乙未四十年趙侯卒

肅侯嘗遊大陵大戊午諫曰耕事方急一日不作百日不食肅侯下車謝是歲薨子武靈王立置博聞師

及左右司過各三人先問

集覽

肥義姓名也趙相

丙申四十四年

趙武靈王元年

夏四月秦初稱王

書法

入綱目以來七十九年矣於是始書月詳秦

則書稱王不宜帝而帝則書稱帝稱皇帝

丁酉四十五年秦張儀伐魏取陝集覽

陝地理志弘農有陝縣古虢國也今

陝州

撫實

一統志云陝古邑名周為虢國地春秋時屬晉戰國時先屬韓後屬魏漢置陝縣為弘農

郡治魏晉因之後魏改置陝州隋初州廢以縣屬河南郡後復置弘農郡唐初復為陝州後改為陝府尋陞保

義軍宋改保平軍金改西安軍元仍為陝州本朝以陝縣省入屬河南府

○蘇秦自燕奔齊

蘇秦通於燕文公之夫人恐得罪說易王曰臣居燕不能使燕重而在齊則燕重王許之乃偽得罪於燕而奔齊齊王以為客卿秦說齊王高宮室大苑囿以明得意欲以敝齊而為燕

書法

於是秦通於文公夫人恐得罪說易王曰臣居燕不能使燕重在齊則燕重王許之乃偽

得罪於燕而奔齊此偽奔也曷為以奔書其奔則偽其所以奔則實書奔所以著秦之隱惡也

戊四十六年

案史記是年齊湣王元年

秦齊楚會于齧桑集覽

左傳

作采桑服虔曰翟地索隱曰河渠書齧桑浮兮淮泗湍徐廣云在梁彭城間張晏云地名如淳云邑名為水所浮漂裴駟云左傳作采桑今平陽陽曲南七十里河水有采桑津是晉境服以為翟地亦頗相近然字作齧桑或云齧桑○秦相張儀免出相魏衛地恐非

書法

相必稱以恒辭也據四十一年秦以張儀為相此其曰相魏何魏不能用儀而為儀所用

也故去就在張儀則不書魏以張儀為相而書張儀出相魏取舍在黃歇則不書楚徙封黃歇而書

黃歇徙封於吳

發明

四十一年書張儀伐魏取陝矣今馬免相于秦乃出

而相魏以儀之反覆固不足多責為魏國者不亦愚之甚耶且魏獨不思前年之伐我者誰歟往年之伐我者又誰歟彼親用兵以伐我既與我之父兄子弟交鋒接刃力為仇敵今乃出而相我後之觀史者猶且惡其譎詐為之忿然不平魏乃舉國聽之幾何而不亡哉惟夫合網目前後所書觀之然後知儀之為反覆小人而魏之為削弱不能自立也卒斃于秦不亦宜乎

○韓燕稱王考異

據四十四年分注趙武靈王赧王十七年分注趙惠文王則趙亦稱王矣

然諸國稱王皆書而趙獨不書疑漏

時諸侯皆稱王趙武靈王獨不肯曰無其實敢取其名乎令國人謂己曰君

書法

於是趙武靈王不肯稱王令國人謂己曰君則何以不書常事也而五國之罪著矣

己亥四十七年秦伐魏取曲沃平周

儀相魏欲令魏事秦而諸侯效之魏王不聽秦伐魏取一邑而陰厚儀益甚

庚子四十八年王崩子定立

是為慎  
親王

齊號薛公田文為孟嘗君考異

提要號  
作封

初齊王封田嬰於薛號曰靖郭君嬰言於齊王曰五  
官之計不可不日聽而數覽也王從之已而厭之悉  
以委嬰嬰由是得專齊權嬰有子四十餘人其賤妾  
之子曰文通儻饒智略說靖郭君以散財養士靖郭  
君使文主家待賓客賓客爭譽其美請以文為嗣嬰  
卒文嗣立號孟嘗君招致諸侯遊士及有罪亡人食  
客嘗數千人名重天下司馬公曰君子之養士以為  
民也今田文盜君之祿以立私黨張虛譽上侮其君  
下蠹其民是姦人之雄耳書所謂逋逃主萃淵藪此  
之謂也○孟嘗君聘於楚楚王遺之象牀登徒直送  
之不欲行謂公孫戍曰足下能使僕無行者有先人  
之寶劍願獻之戍許諾入見曰小國所以皆致相印  
於君者悅君之義慕君之廉也今始至楚而受象牀  
則未至之國何以待君哉孟嘗君曰善遂不受戍趨

出未至中閨孟嘗君召而反之曰子何足之高志之揚也成以實對孟嘗君乃書門版曰有能揚文之名止文之過私得寶於外者疾入諫司馬公曰孟嘗君可謂能用諫矣苟其言之善也雖懷詐諛之心猶將用之况盡忠無私以事其上者乎詩集覽靖郭君索曰采封采非無以下體孟嘗君有焉郭侯是也五官之計齊國策注引記曲禮天子之五官曰司徒司馬司空司士司寇典司五衆計其事之凡也高誘曰計簿書也已而厭之齊國策王曰說吾而厭之注言汝既說我則不得自厭故悉以五官之計委之通儻或作侗儻注侗儻卓異也侗音他歷反登徒直送之史記注登徒姓名楚大夫登徒子也直猶當也當送象牀齊國策注登徒楚官也文選宋玉好色賦登徒子注以登為姓非詐諛漢息正誤今按夫躬傳造詐諛之策注諛虛遠反亦詐也

田嬰告齊宣王乃諸侯五官禮記諸侯適天子命五官而後行註五官五大夫典事者諸侯有三卿五大夫即五官也已而厭之今按此謂齊王厭於聽覽也

書法

書賜號始此終綱目書賜號九是年漢宣帝地節四年博平君平帝元始元年安漢公四

年宰衡陳己卯年周道遙公唐代宗大歷十四年郭子儀尚父昭宗景福二年王行瑜尚父天復二年朱全忠回天再造竭忠守正功臣五代梁壬申年錢鏐尚父劉守光書推不與惟韋叟郭子儀無

譏焉

辛丑慎靚王元年

燕王噲元年

衛更貶號曰君

書法

趙武靈王令國人謂己曰君不書此何以書誅心也

不知守國自貶以求媚於人其褻王



爵卑先祖甚矣綱目前書曰貶號為侯此書曰更貶號曰君甚之也

壬寅二年魏君瑩卒孟軻去魏適齊考異

提要無孟軻去魏適齊六字

魏惠王薨子襄王立孟子入見出語人曰望之不似人君就之而不見所畏焉卒然問曰天下惡乎定吾對曰定于一孰能一之對曰不嗜殺人者能一之孰能與之對曰天下莫不與也今夫天下之人牧未有不嗜殺人者也如有不嗜殺人者則天下之民皆引領而望之矣至齊宣王問齊桓晉文之事孟子曰仲尼之徒無道桓文之事者臣未之聞也無已則王乎王曰德何如則可以王矣曰保民而王莫之能禦也曰若寡人者可以保民乎哉曰可曰何由知吾可也曰臣聞之胡龔曰王坐於堂上有牽牛而過堂下者王見之曰牛何之對曰將以鬻鐘王曰舍之吾不忍其觫觫若無罪而就死地不識有諸曰有之曰是心

足以王矣詩云刑于寡妻至于兄弟以御于家邦言  
舉斯心加諸彼而已故推恩足以保四海不推恩無  
以保妻子古之人所以大過人者無他焉善推其所  
為而已矣五畝之宅樹之以桑五十者可以衣帛矣  
雞豚狗彘之畜無失其時七十者可以食肉矣百畝  
之田勿奪其時八口之家可以無饑矣謹庠序之教  
申之以孝悌之義頒白者不負戴於道路矣老者  
衣帛食肉黎民不饑不寒然而不王者未之有也集  
覽 鬻鐘新鑄鐘殺牲以血塗鬻郤也記雜記宗廟之  
器其名者成則鬻之以黻豚禮春官天府鬻寶器  
鄭司農云鬻讀為徽或曰鬻鼓之鬻刑于寡妻詩思  
齊篇文公傳曰刑儀法也寡妻猶言寡小君言文王  
以儀法內施於閨門而  
及于兄弟以御于家邦

書法

魏稱王矣其曰魏君何民無二王也然則魏  
故侯爵也曷為不以其爵書彼其所受於天

子者而既棄之矣吾又安得而予之貶曰君焉是夷之於衛也自是五國皆卒稱君上書魏君瑩卒下書孟軻去魏譏在嗣君矣

發明是時魏已稱王矣胡為止書魏君哉夫王者天為萬世法其義甚明當時徐楚吳越僭號稱王聖人待以夷狄皆書曰子所以深加貶絕示天下以民無二王之義也戰國之初三晉始得侯爵至顯之三十五年綱目書齊魏會于徐州以相王四十五年書秦初稱王四十六年書韓燕稱王則是當時諸侯皆稱王矣然綱目於諸國未稱王之前各書本爵至稱王之後通書曰君蓋不予其自稱之僭也夫有其實則可以居其名無其實烏可居其名哉自是而後列國例皆稱君矣

癸卯三年

魏襄王元年

楚趙魏韓燕伐秦攻函谷關秦出兵逆

之五國皆敗走考異

提要無五國二字

○宋稱王

甲辰四年秦大敗韓師于脩魚虜其將鯨申差集覽

脩魚索隱

曰地名戰國屬韓鯨申差韓之大將名鯨疎鳩反差初街反

正誤

鯨申差今案索隱云二將名當是曰

鯨曰申差

斬首八萬諸侯震恐

齊大夫殺蘇秦

書法

兩下相殺不書此何以書以為秦之諉足以殺其身而已矣書以為世戒也

○魏請成于秦張儀歸復相秦

張儀說魏王曰梁地方不至千里卒不過三十萬地四平無名山大川之限卒戍四境者不下十萬梁之地勢固戰場也夫諸侯之約從盟洹水之上結為兄弟以相堅也今親兄弟同父母尚有爭錢財相殺傷而欲恃反復蘇秦之餘謀其不可成亦明矣大王不事秦秦下兵攻河外據卷衍酸棗劫衛取陽晉則趙不南梁不北而從道絕矣大王之國雖欲無危不可得也魏王乃倍從約而因儀以請成於秦儀歸復相秦

秦集覽

河外正義曰卷衍酸棗皆黃河南岸地故曰河外卷衍酸棗地理志卷縣在河南酸棗縣

在陳留衍地志闕徐廣曰卷即卷津在滎陽與衍相近卷音權字林音丘權反正義曰卷與衍在鄭州酸棗屬滑州陽晉括地志云故城撫實一統志云卷古在曹州乘氏縣西北三十七里邑名春秋時屬

晉戰國時屬魏漢置卷縣屬河南郡後省之故城在  
開封府原武縣之西北酸棗古邑名春秋時屬鄭戰  
國時為韓所都秦置酸棗縣漢屬陳留郡後魏屬東  
郡北齊廢之隋初復置屬滑州後屬滎陽郡唐屬滑  
州五代梁屬開封府宋改延津縣金置延州後廢之  
元仍為延津縣本朝因之改屬開封府陽晉古邑名  
春秋戰國俱屬衛秦滅衛遂廢之故  
城在兗州府曹縣西北三十七里

書法

張儀出入綱目悉書之特筆也秦之譎張儀  
為之然則秦能用儀矣其亦書相秦何儀魏

人也相秦而書曰歸所以著前之出為秦謀而非  
果免也今乃歸而復其位焉耳不書秦以非新命  
也

乙巳  
五年秦伐蜀取之

巴蜀相攻俱告急於秦秦惠王欲伐蜀韓又來侵司  
馬錯請伐蜀張儀曰不如伐韓王曰請聞其說儀曰  
親魏善楚下兵三川攻新城宜陽以臨二周之郊據  
九鼎按圖籍挾天子以令天下天下莫敢不聽此王  
業也臣聞爭名者於朝爭利者於市今三川周室天  
下之朝市也而王不爭焉顧爭於我翟去王業遠矣  
錯曰不然臣聞之欲富國者務廣其地欲彊兵者務  
富其民欲王者務博其德三資者備而王隨之矣今  
王地小民貧故臣願先從事於易夫蜀西僻之國而  
戎翟之長也有桀紂之亂以秦攻之譬如使豺狼逐  
羣羊得其地足以廣國取其財足以富民繕兵不傷  
衆而彼已服焉拔一國而天下不以為暴利盡四海  
而天下不以為貪而又有禁暴止亂之名是我一舉  
而名實附也今攻韓劫天子惡名也而攻天下之所  
不欲又未必利也不如伐蜀惠王從之起集覽司馬  
兵伐蜀十月取之秦以益彊富厚輕諸侯

完之裔完為齊大司馬後因氏焉錯名也音措二周  
公羊傳曰東周者何成周也西周者何王城也高誘  
曰西周王城今河南也東周成周洛陽之地索隱曰  
周考王封其弟於河南為桓公卒子威公立卒子惠  
公立長子曰西周公封少子於鞏仍襲父號曰東周  
惠公於是東有東西周二周九鼎夏禹貢金九牧鑄九鼎  
以象九州之物乃三代傳國寶也桀有昏德鼎遷于  
商商紂暴虐鼎遷于周武王遷之成王定之于郊鄆  
秦昭王取之

燕君噲以國讓其相子之

燕相子之與蘇秦之弟代昏欲得燕權蘇代使齊而  
歸燕王問曰齊王其霸乎對曰不能王曰何故對曰  
不信其臣於是燕王專任子之鹿毛壽謂燕王曰人  
謂堯賢者以其能讓天下也今王以國讓子之是王



與堯同名也燕王因屬國於子之或曰禹薦益而以  
啓人為吏及老傳天下於益而啓與其黨攻益奪之  
天下謂禹名傳天下於益而實令啓自取之今王言  
屬國於子之而吏無非太子人者是名屬子之而實  
太子用事也王因收印綬自三百石吏已上而效  
之子之子之南面行王事而噲老不聽政顧為臣集  
覽鹿毛壽徐廣曰一作屠毛又曰甘陵縣本名屠索  
隱曰春秋後語亦作屠毛壽韓子作潘壽戰國策  
鮑彪注鹿謂鉅鹿也壽之所居屬國屬音燭付也以  
燕國付與子之以啓人為吏索隱曰人臣也以啓之  
臣為益之吏效之子之索隱曰效呈也謂以印呈與  
子之噲老戰國策注噲以老自休顧為臣顧反也言  
燕君反為正誤鹿毛壽今按劉伯莊云三  
子之之臣

書法

書以國讓何罪噲也以者不當以者也故以失地例名之

發明

必有非常之人然後能行非常之事燕噲何人乃欲以堯自居而以子之為舜乎自魏晉

而下名為禪代者綱目皆直書其自立之實未嘗以遜國予之今觀此書則知噲自以國遜其臣而非子之篡取其國也然子之乘燕噲之愚設謀游說處非其據卒之君臣俱不能免均為妄人也已書之于冊足貽千古之笑爾

丙午六年王崩子延立

是為  
赧王

御批資治通鑑綱目卷一上

謹案第七頁後四行本春秋蔡地按戰國策請蘭  
皋狼之地注蘭元作蔡蔡非趙地

第七頁後七行浸當作沒廣二尺曰版按不浸者  
三版正用史記語不必改沒字又史記正義引  
何休云八尺曰版

第八頁前一行汾源出嵐州靜樂北管涔山東南  
刊本涔訛岑據水經注改

第九頁前一行今中山府是按唐無中山府此非

索隱語

第九頁前七行故城在恒州房山縣東二十里刊  
本恒訛鎮房訛旁據史記正義改

第十頁前八行屬陝州按舊唐書地理志虞邑屬  
陝州在乾元二年又屬河中府按新唐書地理  
志安邑屬河中府在元和三年此俱脫誤

第十一頁前一行晉伐阿甄刊本阿訛河據史記  
改

第十六頁後五行春秋時屬晉戰國時屬韓按漢地理志春秋衛輿于帝丘今濮陽是也後為韓魏所侵盡亡其旁邑獨有濮陽後秦滅濮陽置東郡此因嚴仲子事遂據以為韓地并上邈春秋時亦以為晉地誤甚

第十八頁後五行在大梁東界按今山東汶上縣西南至河南開封府不下七百里此誤

第二十一頁後一行跨豫章饒州南康之地按豫章

當作洪州南康下原本有軍字此誤刪又漢地  
理志豫章彭澤縣西有彭蠡澤宋江州之彭澤  
湖口縣皆漢彭澤縣地今彭蠡澤在九江府城  
東南九十里則此又當增江州二字後並同  
第二十一頁後四行濟水出常山房子縣贊皇山  
按此石濟水非濟水也此妄去石字以証濟水  
誤甚

第二十一頁後七行禹疏龍門以通水按伊闕固

亦號龍門然水經注伊水篇第云大禹疏以通水而無龍門字其鑿龍門之語自見河水篇此牽合誤

第二十一頁後八行在太原西北九十里按羊腸之名所在多有然此下既引正義謂在太行山則不得又在太原西北也此誤

第二十二頁前八行沅漸元辰叙酉澧資湘按元當作無蓋無訛為无又轉訛元也說文無本古

舞字故無水或加水作濩又作澠朱子考定九  
江去無澧二水而易以瀟蒸

第二十二頁後四行河水源自平陽府垣曲縣東  
流按漢地理志河自羌中積石山東北至章武  
入海過郡十六行九千四百里今單舉垣曲縣  
言之且著一源字誤甚

第二十二頁後七行八行泰華二山名按夏桀之  
居右泰華即禹貢之太華若以泰為岱則在河



濟之間不得云右矣此誤

第二十三頁前五行河出孟門之上即此山也按  
孟門當以集覽所引索隱說為正此誤

第二十四頁前二行西者秦州西縣按西為西縣  
則河字無著此正義之誤秦紀穆公九年之河  
西正義謂同華等州地此當從之

第二十六頁前五行在絳州翼城東北二十五里

按元和郡縣志東北作東南

第二十九頁前一行戰國屬趙按元和志懷州管縣五七國時屬韓魏二國此誤

第三十一頁後七行唐屬河中府宋因之按文獻通考同州韓城縣梁屬河中府後唐還隸同州宋無改此誤

第三十八頁後四行在渤海東平縣按漢志渤海有東平舒唐地志平舒屬河間郡俱與此異

第四十八頁後一行黃帝之後生并明按山海經

并作弄又作卞

第五十頁後二行注見唐昭宗景福二年泗州按此徐州徐廣曰今薛縣也此誤

第五十三頁前五行在今安陽縣北刊本陽訛樂按水經注洹水篇魏土地記曰鄴城南四十里有安陽城城北有洹水今據改

第五十三頁前八行欲威侯怒而從之耳按史記作蘇秦說韓宣惠王索隱曰世本韓宣王昭侯

之子也此誤


第五十四頁前二行屬魏郡刊本郡訛都據漢地  
志改

第五十四頁前四行故城在兗州府濟寧州南六  
十里刊本寧訛南據明地理志改

第五十七頁後三行五代梁置護國軍節度按唐  
書方鎮表光啟元年賜河中節度號護國軍節  
度此誤

第五十八頁後七行改為陝府尋陞保義軍按唐  
方鎮表龍紀元年賜陝虢節度為保義軍節度  
地理志陝州陝郡天祐元年為興唐府哀帝初  
復故據此則置軍在前改府在後此誤





總校官庶吉士臣張能照  
校對官檢討臣郭寅  
謄錄監生臣劉垠